



耳溪集

十四

墓碣銘

共二十二

~ 16
2330
14



和
統 2330
卷 21-14

耳溪集卷三十目

墓碣銘

禮曹正郎朴公墓碣銘

三道統禦使贈兵曹叅判忠烈羅公墓碣銘

懷仁縣監洪公墓碣銘

軍資監叅奉全公墓碣銘

侍講院弼善高公墓碣銘

贈司憲府執義李公墓碣銘

晉州牧使贈左承旨申公墓碣銘

司憲府監察李公墓碣銘



耳溪集 卷三十一
慕孝齋鄭公墓碣銘

養默齋崔公墓碣銘

晚悔堂李公墓碣銘

四隱蘇公墓碣銘

后溪趙公墓碣銘

春菴蘇公墓碣銘

耳溪集卷三十一

墓碣銘

禮曹正郎朴公墓碣銘

并序

嗚呼 莊陵乙丙之際時則孔艱事有至難惟六個
臣盡心所事之死不貳當時或有同志之士隱而不
章爲世所諱人無敢言其事者况代遠而跡湮乎若
禮曹正郎朴公是已公諱審問貫於密陽新羅之世
王子八人各受封邑密其長也高麗時史逸其傳有
司憲糾正鉉典理佐郎文有兩世俱以三品致仕至
典法制書思敬始大顯至典儀判事忱叅本朝開國



勲寔生副提學諱剛生號蘿山耕叟首選集賢館倡明程朱之學與權陽村近許敬菴稠爲道學交娶坡平尹氏三司右尹承慶之女文肅公瓘之後舉三子長曰疑問次曰切問公其季也以永樂六年戊子生幼有異質聰穎過人十六歲蘿山公歿於安邊府公之二兄皆先亡獨當送終大事一遵家訓返櫬故山廬墓終喪哀動鄉里奉偏母服勤無違仲兄之子叅贊公仲孫與公齒相比相與勉誡曰吾與汝蚤失庭訓苟不大加策勵何以慰慈心而繼家聲乎遂刻志篤學未弱冠成鉅儒叅贊公蚤擢第入集賢館而博

洽則猶讓於公於是宰執交薦蔭仕司醞直長正統丙辰 英陵親策問公中丙科與李忠簡公塏同榜時稱得人公以法家子早負聲譽物論皆以清要期而公之妹選入莊懿宮主常懷兢惕愈欲歛退丁巳在記注舍金節齋宗瑞爲咸吉道都節制有事六鎮辟公爲從事邊疆旣拓城築且完與公議安撫之策公曰得地而逐人雖非綏遠之道然野人梗悍朝夕煽變養寇生患終非萬全之計節齋然之力請于朝徙南民以實之癸亥竣事還陞拜禮曹郎久潛不遷及癸酉節齋死公感慨語叅贊公曰余非敢有薄堯

舜之心各自靖獻于 前王而已自是謝病居家滿園栽杜鵑每花開月明之時嘯咏以寓志與成梅竹三問河丹溪緯地數君子相往來時有天朝質正之役公膺命辭不獲將赴京成河諸公皆來餞留與夜飲携手步月至杜鵑叢前公朗咏感時花濺淚恨別鳥驚心之句泣數行下諸公亦揮淚而別及使還到義州聞六臣已死愕然失聲夜辟左右留一信裨潛語曰吾與六臣有約今皆死之何忍獨生將何面拜先王於地下乎吾今日已決死只欲毋負皇天與夷齊同歸耳因贈一封書往致於兒輩誠以 幼主時

所帶官禮曹正郎題墓與廟可也言訖卽仰藥軍官驚惶救不得臯復于義州客館嗚呼公之貞忠苦節無異六臣而不負素心視死如歸可謂烈士也雖子孫亦不敢顯言稱揚寢遠寢微罕有知者惟寧陽尉鄭公悰有家藏故冊記丙丁死節諸人甚詳而別書朴某文科注書嘗與成三問等有謀赴京未偕還到義州聞其死飲藥卒東史通攷丙子節死錄亦載公名其外野史及忠義錄等書皆可攷也 莊陵旣復位諸賢俱蒙褒贈而公獨泯焉無傳志士之慨傷寧有極乎公配清州韓氏副使承舜之女忠簡公理

之孫墓在高陽元堂里葡萄谷丁坐之原與夫人同岡異壙舉七男一女長元忠早登文科與佔畢齋金公同榜齊名官至洪州通判有三男一女次元恭司直有一女次元懿司直有三男次元正進士有四男次元良無后次元溫有一男五女次元俊有五男二女女適僉樞金士讓有二男後承至今蕃衍多達官聞人曾孫嘉善府使彥璋四世孫節度使麟壽五世孫叅判晉壬辰以兵使擊倭屢立戰功諡毅烈外孫則領相姜士尚監司李萬雄右相閔維重監司鄭始成最著十世孫希聖有文章隱居山樊與余善其子

持家狀來求墓道之辭余雅慕公忠節卓然不辭而爲之銘曰

爲君致命與友約死身則出疆事乃未遂退而自靖心亦無愧奮然獨絕確乎弗貳君子攸難主耳友耳六臣可七三仁可四鬱彼魯陵有壇有祀公獨不食志士之恥志士恥之徵于良史良史書之墓門有巋

三道統禦使贈兵曹叅判忠烈羅公墓碣銘

并序

大明崇禎之末清人起長白盡有完顏故地席捲而西虎踞遼瀋關東守土之臣無不毀冠翦髮望風稽

首當其建大號朝諸部也惟朝鮮二使抗言不屈清
帝義而歸之其行人之首卽羅公德憲也公字憲之
其先豫章人浮海而東居羅州始祖富仕高麗爲監
門衛上將軍至典農寺正公彥佐我 太祖征倭于
雲峰入我朝有務安縣監自康卽公五世祖也將仕
郎繼祖直長逸孫監察晔高曾祖三世也尼城縣監
諱士忱號錦湖以學行舉遺逸是爲公考生六男公
其季也妣贈貞敬夫人光州鄭氏僉使虎女以公贈
三世公生于萬曆元年癸酉儀貌魁傑善騎射年十
七鄭汝立獄起錦湖公爲怨家所中被逮 宣廟聞

其孝行特原之公坐配鐵原旣宥遭錦湖喪癸卯登
武科李公德馨長兵部知公才授宣傳官出爲扶安
縣監壬子除義州判官甲寅由水原中軍陞通政是
時滿洲強盛稱後金公憂之願乘障自効己未以北
道防禦使兼吉州牧使轉堂上宣傳官甲子李适叛
公佐都元帥張晚破賊于鞍峴公夫人與元帥妻姊
妹也元帥欲上其功公曰姻婭有嫌大丈夫安可受
人之疑力辭之只錄振武原從勲除鳳山郡守移安
岳郡守因事就逮庚午檄烏副將劉興治殺其帥陳
繼盛本朝義討之選可訥探者起公獄中攝刑曹叅

議充接伴使入楸島興治已移旅順矣朝廷命公留
劉宣川鐵山之間以備島衆周年還癸酉充信使赴
瀋金主盛兵衛以見公不少動舉違約五事詰責之
仍覘其疆域大小兵馬衆寡器械苦良條列馳啓歸
拜定州牧使甲戌又以信使如瀋會有訛言我助兵
皇明夾攻金者拘辱公數月公抗辨不撓 上遣宣
傳官李廷馨往諭之金人始許還乙亥除昌城府使
尋移義州府尹丙子二月復差信使赴瀋至平壤遇
金使英固爾岱稱有汗令要公還京待竣事同往公
不聽曰公之於汗令我之於朝命其不敢違一也時

觀察使洪公命者不受金使所帶西獫禮幣金使怒
曰我汗已服大元五十餘王子天意人心有所歸今
將加汗大號兩國兄弟也豈使不知西獫之來爲講
此事貴國當遣王子弟來賀公曰彼獫皇朝叛虜不
當通好於我金雖加號我何必賀爲金使竟以獫行
議尊號朝臣及太學諸生交章請斬金使街童爭投
瓦石擊之兩國之釁自此始矣於是金使逃歸時公
次于義州回答使李公廓亦至金使邀二使謂之曰
我諸王子有書而貴國不受何也公曰書中若議加
號則我國義不可受金使曰朝鮮徒尊南朝不識天

命我汗招降諸獫狁拓疆域尚不可以進號乎公曰
我國臣事明朝二百餘年矣君臣大義炳如日星何
爲慢語嘗我金使曰使臣入藩大議已成雖欲不從
得乎公曰吾雖懸首汗庭志不可奪遂與李公同到
藩英固爾岱大言曰天下非一人之天下安得久據
况政令刻薄其亡可立而待朝鮮之服事非計之得
惟我汗推誠待人有戰必勝誰敢不從乎公曰我國
雖小素秉禮義豈忍背明而從爾英固爾岱曰朝鮮
聞我西犯謀乘我虛我且先犯爾國公曰西犯之計
吾實不知乃爾國先自渝盟而恐脅我也無何汗將

出南郊受號俘譯鄭命壽請使臣往觀以試意公拒
不從四月十一日金數十騎來言汗今受賀可整服
而待公曰吾得死所矣遂與李公東向四拜壞帽裂
袍拔佩刀授命壽曰必欲刼我速斷我頭二公遂相
與解髮駢首交手縮結鉤連而臥時汗已受尊號曰
寬溫仁聖皇帝國號大清改元崇德八固山諸王子
將士數千人羅立左右兵衛甚盛促公詣班校卒數
十拖曳公髮鬚盡落公時年六十餘盡力相格喘息
欲絕俘人之爲彼將者愍之曰兄弟之國一拜何害
而不自恤乃爾公曰非有君命雖死何可拜其人相

顧曰多也多也蓋嗟嘆之辭也汗受賀禮成驅公入館翌日汗出東郊又執二公英固爾岱曰今日不拜大刑戮小拘繫公曰殺則殺囚則囚因大罵彼人羣毆之折左脇降人廣寧摠兵密語譯官曰吾輩世仕明朝甘爲俘虜不死非人也今見東使不屈慚無以見人挽止毆者汗又令拘之館明日大會將議殺公汗兄子要魁諫曰彼以死爲榮我若殺之彼有成仁之節我受殺使之名非所以聞於他國也汗遂不殺促公東還付國書不許開見公曰不見不可受英固爾岱迫令置裝中使百餘騎押驅至通遠堡而去公

念汗書義不可齎往又不可毀棄乃混置紙布之笥載以一馬托堡人曰馬病裝重姑送藩中以俟後日卽先送軍官馳啓是時邊上訛言公叅賀而歸觀察使洪公驟聞之啓請斬公境上三司及館學生齊請按律時吏曹判書金公尙憲力言二使未嘗屈節不當誅命謫公白馬城李公謫宣川是時椶島都督沈世魁因俘人聞二公不屈狀上奏明朝有曰逾奴迫脅鮮臣守義或有疑世魁欺皇朝者七月接伴使李必榮得奏本以啓臺論遂止未幾清將馬福塔持通遠堡所還國書而來請治使臣不叅賀不受書之罪

完城君崔公鳴吉上疏言使臣抗義棄書昭在人耳目都督至於奏聞而橫議猝發按以辱命之罪臣恐國家無以自解於皇朝隨行譯官申繼黯等訴備邊司訟公寃九月 上特命釋公居數月清兵大舉來圍南漢公時在羅州病不得扈駕及 上幸清營汗問羅德憲安在自是我人入藩者多得公事承旨洪公命一以質子歸言漢人有問二公謫戍信否答曰彼不引決近於辱命故罪之漢人曰出疆之臣見殺則死不殺則不屈而已何謂之辱命因自指其頸曰只爲惜此自毀名節耳不引決者正我輩之謂也正

郎李穉嘗見藩人壁上揭二公抗節圖其時 烈皇帝得世魁奏遣御史黃孫茂降勅褒諭而檄島已破我國莫得聞韓平君李慶全時赴京得其實而書報有曰將軍笑顧湯鑊甘蹈白刃聲動華夷名爭日月天子褒其節太史書其美云云公之誣於是益白上嘉之擢拜三道統禦使己卯遞明年正月卒于羅州蓋崇於瀋陽所傷也葬于務安浮珠山公二配咸陽吳氏全義李氏并贈貞夫人吳氏一子守素宣教郎二女適承訓郎金用健進士李儁臣李氏一子貞素從仕郎守素一子禕生員貞素一子禕一女適叅

奉柳漢徵金用健六子一女李儁臣一子二女公爲人慷慨尙氣節沉深有智慮善料事當英固爾岱之初來留館也忽躍馬而出人皆驚惑公往見兵曹判書金公時讓促令使支供官往候東關王廟曰此必陰覘南漢使人不測所往然歸必少憩廟中我若迎候於此彼不謂我無人也已而果如公言英固爾岱憮然有愧色及公歿具綾城仁屋來哭曰羅公死國無人焉李公歸自瀋常流涕語人曰當被毆之時我方年壯而猶不可堪顧視羅公顏色凜如秋霜及至摔曳蘆田間直兩僵屍耳彼以食物至恍惚如夢中

而公忽舉兩足蹙之盤中器散落十餘步其剛確之氣萬死不變如此林忠愍慶業自登州至北京有人示公畫像受毆血模糊之狀宛然如昨云公歿後四十餘年 肅廟甲子開城留守李選上疏陳公忠義請褒贈議大臣命贈兵曹叅判今 上戊戌使臣入燕得見乾隆帝所製全韻詩盛述崇德建號時事有曰乃有朝鮮使不拜志獨乖因自注曰太宗旣受尊號羣臣皆行拜叩禮獨朝鮮使羅德憲李廓不拜左右欲殺之太宗曰使臣無禮有意構怨而沮盟好朕終不逞一時之忿戮其使可勿問是詩一出而公之

大節皦然聞天下矣公五世孫璧天在鄉聞此事齋公遺事謁廟堂得以上聞賜諡曰忠烈旌其門璧天以不佞備官太史來乞樹墓之辭余敬受其狀未及述而奉使如燕會新頒開國方畧載公當時事一如全韻而尤詳嗚呼我國之於皇明義則君臣恩則再造非比列國之以小事大而已公於是時身入虎口手仗漢節危辱百端嶷然不動脅可折而膝不可屈可謂毅然烈士也彼於建號之初將以立威天下而猶不加害乃至形於詩而書諸策忠義之感人如此東方秉禮之風斯可有辭於萬世豈不偉哉遂奮

筆而爲之銘曰

有視耿耿有威競競白刃如林大膽如石脰則可斲首不可抑我膝一屈我邦其辱仰矢蒼天俯睨東海九鼎不重三韓爲大開國有乘瀋陽有畫銘乎何有光耀百世

懷仁縣監洪公墓碣銘 并序

公諱成海字通甫其先本中國人唐貞觀九年帝遣學士八人往教高句麗其一卽洪氏賜貫南陽爲海東巨閥高麗初有名悅佐太祖開國官太師是爲鼻祖世有高官聞人曰匡定公奎有安社大勲封南陽

君子戎大匡中贊諡莊簡高祖諱五福吏曹叅判曾祖諱禹平茂州縣監祖諱貴珍通德郎始居山清考諱安濟軍資判官有文章早廢舉潛心聖經號慵齋娶清州郭氏叅奉懷雄女生公於萬曆戊寅才氣異凡五歲能屬文體壯大有膂力壬辰倭亂年甫十五慨然有討賊之意聚里中丁壯數百將赴陣慵齋大驚力止之翌年癸巳賊圍晉州四出抄掠薄近村公腋挾父母背負稚弟而奔謂二弟天海雲海曰吾力不救汝曹急隨我來二弟年十歲上下遇賊被俘題石上而去公見之大慟遂決意奮身討賊母夫人感

念成疾以沒公居喪致哀丁酉倭再搶咸陽山陰爲賊衝公時年二十二募鄉兵六七百遮截嶺隘多設疑兵建旗鳴鼓又灑白土於溪流如浙米水賊謂以兵衆糧多懼不敢入八月賊又踰鐵水谷而入公率衆禦之斬首數十級作詩曰千里三韓境黎元被賊鋒何時平海寇士卒事春農先是公築庫于黃山積粟七百餘石至是開庫餉士餘粟歸之官倉倭有徐鞞沙夫里二賊尤狡悍當秋穫輒劫掠而去公擊殺之居民賴以安堵亂平歸養老父盡愛敬與故舊把酒論文口不言亂時事戊申光海君卽位羣奸用事

公無意仕進杜門十餘年 仁廟丁卯之難傾家財
輸軍糧三百石募兵勤王中道疾作輿而還相臣洪
公瑞鳳奏公勞績召拜內資寺僉正數月以親老辭
歸壬申慵齋卒公年已老而哀毀過禮丙子金兵犯
京 車駕入南漢公聞變又輸軍糧三百石起縣兵
數千赴都城未至和成卽還丁丑又拜司宰監僉正
移右通禮庚辰除懷仁縣監清簡爲治半年而歸民
立石以思之甲申皇明亡公揮涕作詩以敘悲丙戌
十一月朔日終葬于雙溪寺麓面午而封夫人慶州
李氏判官瑀之女歿同穴子長以範有學行號忍默

齋次仁範乃範執範以範子受九受大受亨受亮受
九子巨源曾玄不盡錄銘曰

二弟浮海鵠鴿之求弱年奮身國賊家讐三輪糒糧
再執干矛我盡我職志豈官酬薄試牛刀歸臥一丘
遺餘後人不墜先休

軍資監叅奉全公墓碣銘 并序

昔我 穆陵御世長蛇起陸食我封疆 車駕西遷
八路幾墊惟時二南士大夫羣起而奔難拔距搃吭
賊不能支終成復國之績在湖南則高霽峰金健齋
爲倡首而全公慶元亦其亞也公家居聞變奮臂誓

心以白衣率家僮村民從倡義使金千鎰贊畫方畧
跋涉千里從行在 宣廟嘉之特授軍資監叅奉公
辭不就全氏世居羅州公自幼聰慧及長受學於外
從祖羅松齋世纘博學多聞孝於事親親歿三日不
粥三年不出廬喪祭一遵朱文公家禮朔望省墓與
兄弟友析居分產自取其老奴薄田一鄉稱之所居
數里外有土賊誠其衆曰勿犯南山善人之居可知
公實行足以服頑也常構一室扁曰雲菴好植花樹
以寓隱居之趣恨不死於戰陣杜門謝世生於嘉靖
戊午終於己巳葬于本州潘溪村壬坐之原公字伯

休天安人以高麗天安君樂爲鼻祖十世祖仁亮官
閣門祇候贈左僕射天陽君諡武節再傳有諱翊文
科官大提學見麗史選舉志其後冠纓不絕曾祖諱
壽虎判官祖諱琛叅奉考諱大得容儀秀美文辭超
凡嘗詣講席考官稱之曰吾行郡縣多矣未嘗見此
輩人何講爲斯可見公家庭之淵源矣妣利川徐氏
叅奉繪女公娶咸平魯氏仁老之女嘗有淑德與公
同原而葬舉三男二女男曰致誠贈掌樂院正致諄
致諒女適金成器李完致誠有五男曰以孝以悌贈
戶曹叅議以忠以信以赫以悌有三男季曰載安贈

戶曹叅判載安子性猷年滿百歲爵至崇政大夫追
贈上三世公之後孫宗煥持公行蹟來乞樹墓之文
余觀公忠義之節孝友之行固可銘也其孫之享大
耄推榮贈亦由積善之報歟銘曰
白衣奮袂從王于西事畢辭官浩然歸棲生死雖殊
義均高金壽未中身名垂來今盜不入里樵勿上壟
太史作銘善人之塚

侍講院弼善高公墓碣銘

并序

公諱傅川字君涉以耽羅之高貫于長興有刑曹佐
郎雲仕 靖陵與己卯諸賢顯名于世子曰大司諫

孟英是生霽峰先生諱敬命壬辰島夷之難倡義殉
節與中子鶴峰因厚同日死于錦山之戰長子隼峰
從厚以復讐將又死於晉州一家三節表閭建祠公
鶴峰之子也母咸豐李氏觀察使璫之女以萬曆戊
寅七月十三日生公于光州在襁褓與父母同臥於
席呼曰是川字形也父大奇之因以命名受學于伯
父隼峰公風儀儼然動人年十五遭壬辰變季父晴
沙公提携教育業大進乙巳中進士而晴沙居榜首
一世榮之光海時孽臣造訛爾瞻倡廢 母之論乙
卯四月公與進士鄭澤雷等抗疏斥之因卞完平李

相公扶倫之義辭氣激烈士論以張是年十月登謁
聖文科授校書館正字公父祖殉國才望蔚然而屈
置芸閣者爲爾瞻輩所擯也庚申以冬至書狀官赴
京師纔渡江聞 泰昌皇帝上賓周旋處變無違禮
新皇帝親賜賞賚華人稱之旣復命時事大變遂退
歸昌平與鄭畸翁弘溟林掌令得悅相追隨自放於
詩酒癸亥改紀卽拜兵曹佐郎選知製教六月除南
平縣監是冬解歸家居甲子适反公卽與仲父靜軒
公倡義募兵到泰仁聞亂平罷還三月拜工曹佐郎
尋移兵曹正郎乙丑拜司諫院正言遞拜成均典籍

移直講八月乞補興陽縣監廉白自持丙寅以疾辭
丁卯在光山聞亂赴尼城 東宮駕到公州以號召
使從事官隨到全州統禦使柳斐然辟公爲從事將
治兵北上會和議成 東宮旋駕公亦還家戊辰拜
直講掌令濟用監正十月補善山府使未赴拜禮賓
司導尙衣宗簿諸寺正屢拜掌令而皆不就辛未除
靈巖郡守亦不赴間爲承文院判校壬申除侍講院
弼善兼春秋館編修官是後屢拜栢府春坊丙子六
月六日歿于漢城之第八月歸葬于長城朝會陽卯
坐之原得年厯五十九朝野莫不嗟惜一代名公多

作誄以哀之公爲人謙退和厚未嘗言人之過而及爲臺閣敢言不諱請寢 慈殿拜陵之禮請革宮房免稅又論使臣崔有海私問大禮於華人之罪請削仕版延平府院君李貴連進追崇之議有若角勝清議請罷其職皆人所難言也識者謂有乃祖之風爲詩清勁豪逸如其爲人公凡三娶平康蔡氏贈司僕正忠益之女光山金氏宣教郎信之女豐川盧氏贈承旨宣之女金氏舉一男曰斗綱專心經學以處士終盧氏舉一男曰斗明以能詩名一女營將李咸妻孫曾不盡記公後孫時佐千里賫幣來乞樹墓之辭

不佞常慕公家精忠大節炳耀百世公又克紹家聲立朝風裁有可書者謹敘次而爲之銘曰
高氏三忠如卞平陽蠻海歛波星岳騰光月峰揚聲繼跡名門布衣忼慨尺疏扶倫再奔國難投袂奮身正色臺端諤諤敢言毅烈之子忠烈之孫

贈司憲府執義李公墓碣銘

并序

洪惟我 恭靖大王至德難名錫羨于後本支百世最蕃而昌第十三子長川君諱普生爲始封之祖曰岳陽正諱焜曰花山守諱彭年至沃野令諱龜福以至孝稱至定畧將軍諱玆軍器寺主簿諱振文卽公

之祖若考也主簿公當壬辰之亂船載兵糧扈 駕
龍灣丁卯之變以召募將爲沙溪金先生所倚重有
捍衛江都之功妣尚州金氏生員大鎔女吏曹叅判
法生後也公諱磊字廓如以 宣廟戊子生自幼聰
悟絕人經史百家之文經眼輒成誦妙年高捷漢城
試金叅議吻大加稱賞歸之以姪女然爲文辭好古
而不徇於時故發解十餘度而終不利覆試中年謝
公車杜門讀書洛閩之旨無不淹貫大易之象數洪
範之九疇灑然透徹推以至於星曆卜筮堪輿之術
亦皆旁通深得先天之學大而一元小而一歲日之

晝夜月之盈虧潮汐之進退精研撰圖揭之屏障嘗
曰余襄公潮汐說謂之月之弦望者未免牽合邵子
所謂天地之喘息是耳又曰山川卽天地間一大物
也豈無吉凶感應之理朱子山陵議蓋有見於此但
形家禍福之說恐惑後世故先儒罕言之爾光海時
拜校正郎廳金墉禍起與名宗疏論造訛廢 母之
罪癸丑以後退歸湖南之興德庄舍屏跡息交有一
故舊叅廢 母疏登第而來閉門不見癸亥改玉後
命付軍銜功臣李咸陵澣於公爲戚屬勸以入城叅
勲錄公笑而不答甲子逆适叛 車駕狩公州公倡

同志募義士輸餉行在事載甲子募義錄丙子之亂
與道內搢紳士友募義兵期會礪山進軍於清州聞
江都失守南漢下城北向痛哭而歸自是絕意仕宦
嘗到湖西聞徐叅奉某客歿於逆旅公素無一面之
舊而傾裝而棺斂脫驂而送喪遠近服其義以仁
廟丁未卒遺戒勿書昏朝職銜只用改玉後軍職葬
于興德大峰山丑向之原公天姿慤厚志氣寬和居
喪盡哀奉先致誠事繼母極其孝敬處兄弟篤其友
愛析產自取薄劣婦家分送臧獲却而不受廉謹自
持圖書滿壁正衣端坐蕭然無塵事以終其年朝廷

高其節義贈司憲府執義公娶慶州金氏屹女也生
二男曰國馨贈左承旨曰國成國馨二男曰綱贈大
司憲曰經綱有四男曰命天性天郡守希天錫天同
樞經有一男曰峻天命天有二男二女曰溶曰潐平
山申思績文化柳德徵察訪妻性天有二男一女曰
湜曰濂鄭齊嵩妻希天有二男一女曰淑曰浹平山
申思恒妻錫天有二男曰沃曰灤沃子曰文衡學行
爲時所推號稱茅湖余嘗序其遺集公之後孫仁復
仁英具公言行千里來乞牲石之辭余感其誠敘以
銘之銘曰

世遭昏亂抗章斥奸時丁板蕩奮身赴難志在報國夫豈媒勲仁推愛親義著急人廉以澡躬學究先天名父之子王孫之賢我銘不僭維石永傳

晉州牧使贈左承旨申公墓碣銘 并序

肅宗大王二十四年戊寅前縣監申奎上疏曰昔我世祖惠莊大王以天縱之聖屬河清之運戡定禍亂天命人歸 魯山君冲年膺寶應天順人法堯禪舜稱爲 上王觀乎受禪教文亦可以有辭萬世而不幸六臣之變出於不意勲臣密贊之議又從而激之使 世廟保護 上王之恩不克有終忠臣志士之

感至今未艾一片孤墳邈在荒陬五十餘年之間香火不及 中宗御極特遣承宣備物致祭立後奉祀之論始發於李若水而爾時大臣不能正議至使敢言之人幾被不測之罪吁可惜哉 宣廟時又因觀察使鄭澈狀啓改修墓表祭用一品之儀我 列聖追報之典至此無憾然臣謂猶有所未盡也夫以臨御之君而遭廢黜如漢之昌邑齊之鬱林及我朝之燕山光海皆由昏德敗度自絕于天則削號貶位待以不死帝降爲王王降爲君其亦幸矣若乃禪位之君曾無失德而或出於一時之權宜或迫於難言之

事勢遜位就閒周漢以降何代無之而尊號之稱未聞貶損豈不以傳禪之事異於放黜異讓之跡殊於敵怨故也 魯山君君臨一邦國人愛戴既遜之後猶稱 上王假令六臣無謀變之舉而 魯山考終其命則葬祭之必用王禮斷無疑也昔漢貫高之變趙敖不與同坐者以其不知謀故也今日 聖上既嘉六臣之節特許建祠宣額彼爲 故主死節之臣已蒙寵嘉之恩况爲 故主而不知其謀曾無疵德然猶沒不得其寧祭不用其禮者 殿下獨不爲之愍然乎時移事往丘壟已平蓬科蕪沒狐兔躑躅春

風杜宇長入騷人之句麥飯寒食空吞野老之聲土人相傳楓哭時聞安知夫無限幽冤盤礴鬱律於泉臺百世不化又安知 祖宗在天之靈洋洋陟降有不盡傷於僂然之孤魂耶今若追復王號祭用王禮封其寢園別立祠殿一如皇朝追復 景皇帝故事則參諸古昔允合情禮神理可慰而天心可悅人情亦必爲之翕然矣 肅廟覽之泫然下涕亟命收議百官仍下教曰申奎之疏展讀未半自切傷感今茲追復益有光於 光廟盛德無乃 祖宗在天之靈相感於冥冥之中耶其令禮官亟舉盛儀嗚呼夫以

眇末疎賤之臣敢論 宗廟莫大之事苟非危忠大
膽判決死生至誠讜論孚感天心其何能辦此百世
之下讀其文可以激昂而流涕矣申公字文甫自號
曰醉隱器宇宏傑倜儻有奇氣家素貧無以養親年
甫十三慨然歎曰親饑奚恤吾身哉廼躬自乞貸於
媪親陽坡鄭相公太和一見奇其貌厚遺之以供其
親仍館于書齋公於是力學績文二十歲中司馬二
十六擢增廣文科平居讀書每到古人敢言立節處
輒擊案嘆賞語人曰丈夫立身事君當言而言當死
而死不可計利害怵禍福也戊寅歸自湖縣閉門艸

疏極言 魯山追崇 慎妃復位二事疏成囑其昆
季曰須以一藁席收吾骨埋之露梁江上足矣蓋六
臣塚在露梁故也遂詣闕獻疏 上爲之感悟卽命
追復 端宗位號至於 慎妃事嗣王未敢輕議下
御製一絕曰昔在元妃配 至尊建春夜出國人冤
惻怛那無追復意柰茲不識 聖心存逮至 英廟
亦舉 溫陵追復之禮特贈公承政院左承旨公之
言於是盡行而無遺憾矣嗚呼國家典禮莫大於斯
二者忠臣義士莫不冤鬱名公哲輔未敢議到至於
數百年之久而乃公一疏上格 廟儀克正如日月

之重明昭垂國乘何其壯也公爲文章初不經意一下萬言屈折奮揚犖犖有生氣如其爲人居官廉白自持其在晉州家人告乏答書送還曰啜菽衣葛是吾本分無以溷我爲也其志操磊落宜乎其臨大事而不懾也然終不能與世俯仰官竟不顯低徊郡紱止於晉州牧使公議惜之公本平山人高麗太師崇謙之後高祖曰彥淑江西縣令曾祖曰景禧松禾縣監祖曰從謹順安縣監考曰纘延務功郎妣曰居昌慎氏詠之女公生於 孝宗己亥卒於 肅廟戊子葬于交河某山娶全州李蕃之女生一男鎮周二女

適李純彥李彥紀鎮周二男範夏瑞夏二女適趙世鎮李鉉章曾曰祥祐膺輔範夏出也監察膺漢瑞夏出也公歿後八十四年辛亥我 聖上輦過露梁特命致祭於六臣墓仍及 莊陵諸義士設壇於隧道之下訪公後孫錄用之于時臣良浩待罪天官問知膺漢名遂舉爲 莊陵叅奉膺漢賈公疏藁來見京師求一言之識未幾膺漢歿後數年公之從曾孫膺善來訪復申前請余常慕公忠義願爲之執鞭又感膺漢之中途殞折愴然傷懷今何敢負逝者之托而泯名臣之蹟乎謹提其大節而系之以詩曰

清冷之水其上有楓有烏哀鳴其口流紅喬山無樹
狐兔交蹤雲車上下肅然其風尺疏叫天若誘其衷
廟貌重光象設肇崇洋洋月遊藻火山龍邦人拜跪
云誰之功 莊陵之臣有六其忠六忠既死有臣惟
公祠下有壇咸秩攸同公墓在此公靈在東

司憲府監察李公墓碣銘

并序

昔我 肅廟已巳國家不幸 坤宮遜于邸士大夫
持祿保位多喪其所守而有以微官抗志不仕者李
公墀其人也公字公獻本新羅望姓始祖恩言當麗
祖統合三韓時爲開國元勳食邑碧珍子孫仍以爲

貫入我朝吏曹叅判約東諡曰平靖以清德負重名
與金畢齋曹梅溪并膾食于院祠寔公六世祖也平
靖有子紹元文科選翰林早歿是生有蕃官承旨曾
祖諱碩明郡守贈叅判以文學行誼名祖諱敏善縣
令亦贈叅判考諱尙逸江原道觀察使號龍巖受業
于沙溪金先生元配慎氏無育繼配李氏司果穰之
女鐵城府院君杏村岳之後也公以崇禎己巳生幼
有異質文辭清警累發解不中庚戌以才行薦授繕
工監役例陞掌苑別提癸丑以義禁府都事拜安陰
縣監因事不赴甲寅拜司憲府監察連遭考妣喪服

畢復除義禁都事移新昌縣監約已奉公人稱其廉
白居數年解歸癸亥入爲監察出監陰竹縣時有疑
獄犯綱常久未決公鉤得其實準其律革其邑人皆
快之乙丑又除丹城縣地是嶺外遐僻民不知法公
威制之恩撫之感而從化明年棄歸爲義盈主簿又
拜監察是年遭瑤華之變憂傷幾廢寢食曰國事罔
極此豈食祿之時耶遂棄官南下卜地于洛東江上
築數楹自號曰晚香蓋取寒花晚節香之義也自是
足不跡京洛日與鄉人杖屨逍遙以花竹琴書自娛
歲甲申考終享年七十六詩人誄之曰完名獨在瑤

華後新塚宜從砥柱傍葬于善山彭山里向巽之原
與後夫人同岡異墳焉公姿性高潔有古人風嘗曰
清德是吾家世傳之物戒子孫毋墜恬於利勢懶於
進取不與達官交遊有一相臣至老不退公在南邑
贈以釣竿以諷之其答書曰深謝故人情貺江湖歸
興自不能抑以故朝廷高其操未嘗久置散地而暫
起旋免歸臥丘園累除外邑清謹自守不以一物自
累人謂無忝爲平靖公之孫少以文墨自喜筆法奇
健大爲書家所許尤精於籌數之學所著詩文藏于
家公娶德水李氏縣令楫之女栗谷先生弟玉山瑀

之曾孫有婦德早歿繼配安東權氏都正順昌之女
丙子之亂母張氏避兵入江都節死朝家旌其門夫
人時年五歲育於外家十七歸于公天姿溫和婦道
純備卒于己卯舉四男二女男長志長次志望次志
容皆早卒次志成女長適士人沈漳次適副提學趙
持謙側室有子女志海武科監牧官次志河志溟女
李久華妻志長二男二女世秘世珩女適生員安宅
仁金宜鍵志望子世玠庶尹志容繼子世珩志成子
世玠世瑒沈漳子尙賢趙持謙繼子命禎郡守三女
李宜復進士鄭錫敷奉事崔尙頤曾玄不盡載公之

耳孫好淳持進善朴公弼傳所爲狀來乞麗牲之銘
朴公儒者也其言有徵謹最其大節而系以銘銘曰
仕非爲祿居以潔已時有不可遜以守志洛東之涘
其流清泚花竹琴書超然永矢完名高節誰爭子所
賢者有述銘于太史

慕孝齋鄭公墓碣銘

并序

奇高峰司馬齋宴會序曰鄭孝子在座年八十鬚眉
皓白儀觀奇偉聞其少時績文種學若將陳力於斯
世乃卷而懷之退身蓬葦約已備物以養兩親嘗遇
疾手奉匕箸躬視藥餌及其在疚年已七十矣廬於

墓側訖再期未嘗歸舍世孰有生能致其養歿能致其哀血氣旣衰而禮不愆如孝子者乎仍賦詩曰事親極其孝精誠與天通耆壽錫無疆八十顏始紅小子未有知卓行徒仰崇綴詩挹餘光萬古垂古風以高峰之高識必不爲溢美之辭而欽誦不已則其言信而有徵矣公諱文孫字光胤自幼有至性日間兩親安否每逢新果必懷遺之父母有疾則憂形于色絕不飲食名聞日播人稱孝童母夫人積年寢疾公晝夜禱天祁寒盛暑衣不解帶食不知味以親命赴科中司馬及榮到之日母病自瘳鄉黨皆稱誠孝所

感其大人之病篤也斷指灌血延半年之壽及遭艱水漿不入口者十餘日負土成墓朝夕上奠悲號毀瘠嘗有烏鵲集于廬上飛鳴不去人皆曰鄭公之孝感於物而然也纔過禫月母夫人病革又斷指以延三朔之命士林相率呈官方伯以聞命旌其閭而復其戶鄉人名其所居洞曰慕孝洞名其室曰慕孝齋此公之居家事親之至行也公生於成化癸巳自十餘歲以小學爲修身之方常語子弟曰爲人之道不外於此以上舍生居太學當己卯士禍與太學生二百餘人倡議封疏伸救靜菴趙先生公名居二又排

闈直入泣訴殿庭遂見逐與同齋生十一人中服徒
跣即日還鄉結茅於錦江上以存心養性講義明理
八字揭于壁又畫十一人圖像付其下名曰錦江契
會圖每值良辰泛舟江上優遊以終老此又公立身
守正之大節也公河東人始祖諱道正六傳而諱芝
衍仕高麗官大匡都僉議贊成事生諱宥官樞密副
使卽公之六世祖也會祖諱希周官司憲府掌令祖
諱宜仲中司馬官潭陽府教授考諱承敘修義副尉
公娶平山申氏叅軍季糾女也有三男長曰綱軍資
監判官次曰純古阜訓導次曰綸武科直長公之後

孫杵岳等持公行狀乞文於不佞思所以壽公者余
惟公善於事親誠於衛道窮而不易其操老而不改
其樂是可以銘也銘曰

孝爲人倫之本聖惟五十而慕若有人兮慕孝乃七
十而廬墓靈鵲巢其顛其鳴响响抗尺疏而叫閭不
脫巾而徒步錦水兮洋洋樂我遲暮太史題其阡慕
賢之故

養默齋崔公墓碣銘

并序

東方之崔多出於文憲公冲而惟籍于和順者自
世宗朝顯有諱濬官舍人有子自濱官大司成皆以

經術雅望名世至諱淨以孝弟文學著子象汶始居南原有文章行誼號稱竹谷孫述克世其德娶礪山宋氏奉事有徵之女是生養默齋諱鳳儀字九成幼而好學從雲溪黃公信龜入白雲山博觀經傳及長遊明齋尹先生之門聞性理之學旁治文藝甲子中進士事親有至性家雖貧甘旨無缺母夫人病革血指以延一日既不幸葬祭以禮丙戌父歿執制如前喪日省墓寒暑風雨不廢手植丘木名其洞曰植松友弟妹有無與共睦于宗族信于朋友鄉黨多感化者每早朝必巾櫛危坐對方冊手寫朱子節要終身

玩繹摸退陶聖學十圖揭壁觀省至大耋不懈韶顏皓髮照映花竹時人目之爲地上仙癸丑六月二十三日朝起謁家廟灑掃階庭翌日翛然而逝去生年八十有五葬于所居里西走峙面巽之原夫人梁氏祔左焉梁氏南原人世者之女舉一男珖亦有至行旌其閭生二男綱宇綱宙皆中司馬今 上戊申鄉人誦慕其德賸享于新浦鄉賢祠曾孫教官崑述其言行千里裹足來乞樹墓之辭蓋能修其世德者也余感其誠而爲之銘曰

人孰無親善事之謂孝孝爲懿行能世之蓋少惟此

崔氏五世允蹈既食于鄉又楔其門養全于默薰德有源南國之望王化攸敦

晚悔堂李公墓碣銘

并序

公諱命天字聖與系出定宗大王第十三子長川君諱普生三傳而有諱龜福爵沃野令以孝聞二傳而有諱振文以軍器主簿當壬辰之亂船粟扈駕又一傳有曰贈司憲府執義磊值光海朝疏論造詔廢母之罪退歸與德子孫仍居焉有曰國馨贈左承旨以才畧薦不起有曰綱贈大司憲配竹山朴氏生員善彬之女領議政元亨之傍孫也以孝廟壬

辰生公其日承旨公夢有人告曰天命降福于爾家驚而寤公已生矣仍命以名與字焉公生有異質弱不喜遊八歲丁憂號泣不食十四歲大憲公有疾甚篤公不交睡解帶日夜涕泣斫指取血以進病遂瘳鄉黨稱孝兒稍長力學經史戊申遭父憂嘗糞驗吉凶事祖考極其誠孝未嘗離側適在京屢月忽心動汗出沾軀疾馳歸省承旨公病革已數日人皆稱其孝感事繼祖母李氏孝養備至及喪公年近六十執禮愈嚴朝夕哭墓寒暑不廢有三弟俱幼左右抱負作長枕大被共處其中析財均分自取薄劣及長每

日兄弟團聚終夕和悅晚歲仲叔二弟先逝有時中
夜起坐涕泣達曙焉公兄弟四人各有二子公曰韋
家花樹之會古事可法也作八從稷讀禮講詩各有
條例吳公道一以德星堂三字書贈之公後改扁晚
悔自解曰君子有三患少也患不得聞壯也患不得
學老也患不得行吾今老矣將以此自省仍作箴揭
于壁其老而自勵如此吳海恩命恒每見南中人士
稱公之賢曰某之孝友之篤堅確之操豈可以韋布
終身耶巡撫使權公尚游以讀書守靜孝友出天薦
于朝命復其戶丙午年七十五疾革遺戒勿求挽葬

于興德大峰山丑向之原會葬者數百人野老村嫗
莫不隨力致賻農不歌巷不儺其德行之感人有如
是矣公性度寬厚容貌清癯整冠束帶終日端坐家
或屢空而晏如也一任天真不事表襮宗黨朋儕無
不得其懽心賓客恒滿坐而和氣盎然族叔邁癘而
歿親戚莫敢顧公獨往視殮薄俗多化之常以禮法
自律少無惰慢之容故子弟非衣冠則不敢進家不
留財而周貧恤喪癸巳大凶賣庄而賑救之早遭禍
祖考妣凡五喪居憂盡禮一依朱文公禮泣血十年
幾至滅性熟講禮經參究東賢說定爲一家祭式每

當祀事躬莅祭饌極其誠敬生辰必祭曰生辰奠獻雖不載禮經而人子追慕之誠亦不可已也當考妣忌自朔朝不御肉食至祭日終夜嗚咽如始喪時國恤必食素寢外訖練乃已雖親舊之喪視其親疎而不食肉至老不懈孝經禮記不離几案恒謂子孫曰修身接人之方事君化民之道莫不由於此書士君子終身服膺可也以至國家典故氏族譜牒無不淹貫曰此亦博聞中一事也前夫人坡平尹氏士人桓女坡陵君噴曾孫也葬于公墓上午向之原後夫人義城金氏士人汝器女鰲峰齊閔之玄孫也與公同

壙而窆公有三男二女男曰祖願女適申思績尹氏出也男曰溶潏女適柳德徵察訪金氏出也溶無子取潏男文彥爲後進士有文行潏取族子文遠爲後女適林翼遠公之後孫仁英跋涉千里齋狀謁余求所以不朽公者余見公制行甚篤有不可泯翳謹撰次而爲之銘銘曰

人有百行之源孝貴終身之慕斫指療病血泣上墓爰及穉弟寒煦饑舖姜公大被韋家花樹德星之堂行者式路晚悔自省篤修彌固立石揭行後人是度

四隱蘇公墓碣銘

并序

公諱永福字重綏姓蘇氏號曰四隱貫曰晉陽始祖曰希哲仕高麗官上護軍世有名卿洎我朝有儀賓都事自坡有六男皆成名其第二曰大司諫諱世良以清名直節顯於中廟朝與弟陽谷諱世讓並稱一代偉人於公爲曾大父也大父諱逢以副提學退老于鄉有四子仲曰膺善甚文陽谷許以華國補漢城庶尹早卒配海平尹氏郡守彪之女無子叔曰縣監諱敏善配平山申氏縣令彥淑之女寔生公爲後於庶尹公公以嘉靖乙卯降聰悟絕人背文輒誦及長意氣豪爽受學於金公殷輝之門慨然有求道之

志於書無所不讀發爲文章操筆立成十七連捷漢城試公不自能益謙晦惟恐名譽先人宣廟壬午中司馬時賢俊當朝公遊國庠專以名節自勵士多傾心請交時上大招遺逸廷臣交薦公會儒生安德仁上疏黨禍起西士之在學者欲聯疏爭之公獨曰近日分黨直由論議同異不可日以賢邪當平心調劑渙其疑而已今居首善之地爭則激我不敢苟同遂揖而歸申公應渠聞之服其遠見公常遇牛溪成先生于途先生聞公名久下馬禮之許以經世才因從之遊先生書勸之仕公辭以學未進壬辰歸省

于益山四月間倭寇與父老募鄉丁僧徒就龍華山設柵聚糧爲捍守備癸巳挈家入山丁酉賊再搶公奉兩夫人避亂入關東寇退歸華山時國家新經大亂措置多疎公自以世祿之臣身雖韋布義不可默上疏陳時務十餘事 上優答之下有司採行辛丑春以宰臣薦授 禧陵叅奉入都謝恩秋棄歸壬寅連丁內外艱服闋年已五十矣謝絕人事常居山中課僮僕事耕圃鄉人來學者教導不輟暇則逍遙於江湖間沙溪金文元公宰本郡政先教化選蒙士訓小學請公表率公辭以病金公每於公餘肩輿造廬

講德義詢政事庚戌以後權奸執命公益堅長往之志絕口不言時事人罕見其面從子鳴國締附權倖有一時宰托用巖穴將舉公擬臺官使鳴國探之公答書切責引朱子論吳伯豐事有顏回爲桓司馬家臣之語未幾鳴國敗公待命于京平昔交遊當世高士勞問者填門巷都人聚觀曰南方賢者九月下鄉感疾數日自知不起處置後事翛然而逝卽十月六日也遠近聞者莫不咨嗟相吊以十二月葬于道川先塋下卯坐之原故友諸生號哭送葬者七百餘人公器宇寬洪符彩英偉天姿近道而學以自得爲主

躬行爲急終日端坐望之儼然起敬篤於內行事親盡其忠愛丁酉避兵東峽也流離半歲而滫瀡之供無減平日人服其誠力居喪一準朱子家禮哀敬備至一日里中不慎火延及先壟公冠帶稽天須臾雨驟火滅人稱以孝感事伯氏如嚴君親供衣食及病革刺指調藥以進誨子弟有法勤學業習禮讓家內小童耻言利慾之事擇交少許可所與遊多名流與金文元鄭愚伏趙重峰韓久菴道義相講磨如金公尙容尙憲李公春英申公應渠尹公洞黃公慎朴公東亮東說李公義健李公基禹宋公英者諸賢交契

最深趙公浩客湖中染病濱危時癘氣大熾死者多公愍焉告母夫人躬自往護趙公甦而公亦無恙人皆嘆異之壬辰亂後客死而不能歸櫓或貧不能葬者爲之營辦與夫窮無以婚嫁者具資裝使不失時世傳家業頗廣中年漸致凋損或至屢空而不之顧嘗曰家有畜積是累其德周人計豐約非義也以故鄉里化之有所爭必就決焉時荐歲亢旱民將四散公建議穿渠四十餘里三年而成一境賴之邑宰禱雨無驗請公將事乃雨愚伏鄭公嘗與會講於書院未幾入爲講官時域中書籍蕩殘於兵火 宣廟命

求遺書鄭公奏曰臣見湖南進士蘇某家所藏甚博請遣使求之公進經傳子史數千卷上命藏于秘省銓官將舉公入仕公貽書力辭曰獻書于進非小嫌也公鑑識甚精鳴國之始生也至產室外聞啼聲不見而歸語家人曰覆我家者必此兒也及長而登庠交貴顯聲譽頗盛公獨不悅遺書戒責竟陷奸黨及於禍公雅好佳山水因先址占形勢構小亭者四春浦曰農隱西浦曰漁隱彩雲曰醉隱道川曰瀨隱合而自號曰四隱春秋令辰倘佯丘壑與朋友數人載酒沿洄嘯咏忘返居則左右圖書博學無方天文

地理醫卜戰陣之法無不通曉四方風土山川關隘亦皆周知少有康濟之志不膠於古不徇於俗通而不隨介而不矯人或以東山不起擬之而公見朋比病國知直道之難行韜光晦跡以沒世識者皆惜之而囂然無憫常論楊龜山應蔡京薦曰天之生材自有用也苟可救時扶顛何論薦者匪人而若龜山晚出無業可見後人不能無疑也斯可以見公之志矣配李氏系出宗支副護軍援之女端慤柔順言動有則閨門井井內外雍睦先公十六年而卒葬同塋異室男長慶門進士次顯門屢舉不中次振門生員女

婿白憲民側室男繼門二女適金清朴璉進士無子
二女婿沈挺宇白弘胤學生四男爾昌爾權爾宏爾
寅四女歸柳後說白弘源李綏先權順久生員不育
以爾寅爲後曾玄不盡錄公潛德不揚世遠難稽而
後孫洙中宦于京與余善持其叔父處士公所爲狀
來求墓道之辭余嘗慕處士之高風邃學其言信有
徵矣於是樂爲之敘系之以銘曰
學以爲已而名自至志在濟物而才莫試我則謂漆
雕開之未信人或比謝安石之不起農耶漁耶隱於
山水道川長逝華岳獨巋

后溪趙公墓碣銘

并序

良浩大父芸窩府君以文章名世所與遊皆一代鴻
匠惟后溪趙公享高年至老相往來唱酬時良浩尙
幼而亦能認識及芸窩下世趙公爲詩而哭之哀良
浩甫冠拜公於溪上之園亭秀眉癯顏翛然若畫中
仙心傾慕至今在目公之曾孫重鎮哀公事行來訪
于江臯屬以麗牲之刻小子何足以知公而惟執役
爲恭托名是榮謹按狀而敘之公諱裕壽字毅仲氏
出豐壤禮曹判書諱珩之孫縣監諱相抃之子妣密
陽朴氏府尹守弘之女公以癸卯十二月一日生方

在抱畫指成字母夫人奇之及就學有神悟往往作
驚人語出遊庠序屢占高等癸亥赴禮部覆試農巖
金公昌協爲考官適便旋歸見一落券滿紙塗抹亟
取來拭去朱抹大讀曰此詩非吾輩所及遂擢置魁
已巳 坤宮遜于邸公厭京洛走湖曲邀嬉山水間
甲戌拜 禧陵叅奉轉至長興庫主簿公清介亢爽
祿仕非其好也數日卽罷去太學士朴公泰尙掌節
製旣折名語同座曰吾見趙某文近世所未有今欲
爲國得一文衡專精而默索卒未之獲異哉蓋公於
是日腹疾作不入闈矣人傳其語公道然而笑未幾

謝舉以文史自娛間嘗就 世子衛率丙戌拜刑工
曹郎得延豐縣監延嶺底荒僻壤也公偶見斷崖叢
榛有懸瀑淙瀉卽命抉其源而導其湍噴如撒珠春
成澄泓遂壓以小亭名曰漱玉筍輿竹筴觴咏於水
聲蘿影之中民皆環視而驚曰吾輩生老此山不知
有此奇境延自是稱山水窟瓜還民磨壁而頌之癸
巳自通禮院引儀除歙谷縣令縣有侍中湖清漪可
泳翔造畫舫沿洄上下民有持牒立岸者命小童投
繩繫牒而引之題畢復引繩還之有欲面訴者呼上
船決已或不肯去曰吾亦願從公遊闔境戴之如父

母旣滿歸鑄鐵而寄慕壬寅自翊贊移戶曹郎出爲沃川郡守沃亦山水邑也時丁大無公罄廩而哺之民無溝瘠事聞賞以表裏癸卯疾歸甲辰拜司僕寺主簿移司導寺僉正尋爲淮陽府使楓嶽舊所遊也上官翌日山僧報霜信奚囊酒瓢飄然而往奇峰邃壑盡意雕鏤拳石尺流悉入題品蓋名山之奇遇騷人之能事也踰年解歸丁未調繕工監副正銓部舉拜掌樂院正是爲蔭途清選已而授茂朱府使徧搜赤裳之山九天之洞重新寒風樓喚睡亭坐嘯爲治戊申賦歸公高標雅韻不肯受簪組羈絆而其官於

外也輒得山水之鄉地以人顯詩與境會鉤剔其幽隱鼓發其奇變殆造物者驅之歟當其散帙哦詩引白對青淡若忘身之爲吏然而民安訟清事無不舉識者謂見公詩文可知有政事才歸自朱峽營一區於東郊新村依巖樹屋激流爲瀑方沼曲澗被以雜花奇石位置窈靚前起小堂扁以柳州曠奧之語角巾丹藜嘯咏其中松石軒宋公成明退居東湖輕舟小驢聯翩來往與芸窩公暨李槎川秉淵崔溪西柱岳曹橋西夏奇鄭謙齋敦約成詩社而謙齋則以三絕稱韶顏皓髮杖烏交錯撚絃弄碁傳盃敲韻超然

出埃壘之表時人比之香山九老至有繪畫而傳之者壬子年屆七十以子叅判官侍從推恩陞通政秩拜僉知中樞府事移敦寧府都正曹司五衛將癸丑拜掌隸院決事李相國台佐金判書始煥鄭判敦壽期以耆社元老又名私社要公及橋西曹公齒會是時諸公之子官多貴顯輪日設席奉觴獻壽金玉輝耀人稱太平盛事乙卯叅判公爲養得長湍公暫就焉賞朴淵赤壁戊午又奉之春川府簡松石公遊清平谷雲之勝公年已近八耄矣登高涉險步履如飛辛酉八月十七日以壽終葬于長湍萬宗音亥坐

原公天才特異早負盛名而家庭學有淵源斤斤以繩墨自持絕無文人骯髒之態惟於詩妙悟深詣汲句釣字刮膚探髓奧情奇辭常吐人所不能道譬如獨繭自織危調孤彈日焉者色變耳焉者神奪可謂詞林之絕藝也已金三淵昌翁嘗曰曾聞某一年作一詩今見其詩真奇才也必傳無疑崔昆侖昌大曰以若才格不脫陳黃門路豈局於年代風氣歟李西堂德壽曰某雖以詩名世文亦甚好短引小跋極似老杜文先輩之論盡之矣夫人柳氏養閒處士軫之女無育取仲氏子迪命爲後卽叅判公叅判有二子

王溪集 卷三十一
時敏官大司諫壽秩知中樞時完縣監女歸判書李重祐庶子時謹時學知樞二子重鎮郡守公鎮正言縣監子璜鎮今注書噫良浩及見公於晚節今已三易世矣當時文彩風流之盛邈然若邃古後生尠有聞而知者今於敘公之狀不覺愾然而永歎也銘曰文貴自得詩則有神其機在天其悟在人水積則腐物老則陳嘔賀心肝發庾清新人惟我喜久乃稱珍東方有公妙契獨臻口所不形筆乃透真斲璞見虹破殼出蠟遺榮葆精與化爲隣山深石古光氣不磷

春菴蘇公墓碣銘

并序

良浩少時聞湖南有蘇處士聲名傾一世時或得見其詩賦瀟爽曠逸不似塵埃中語爲之擊節諷誦而想見其爲人也及執杖屨於樗村門下先生嘗字呼處士曰蘇一渾南中高士其姿質之清高志氣之超邁非吾黨諸子所及也余於是始知處士非文章士乃儒者也益恨其跡不及京洛無由接風儀而聽談論也處士歿三十餘年其從子洙中從宦于京持家狀及遺集來見良浩求所以樹墓而傳世者按其狀讀其文不覺灑然易容斂手而歎曰此希世之宏儒庶幾乎古之逸民或稱曹南冥後一人者未始過也

公諱凝天以高麗上護軍希哲爲初祖籍於晉州我朝有大司諫世良以清名直節與弟文靖公世讓同祀于鄉傳四世諱振門以太學生削鄭仁弘儒籍忤于時歸益山子孫遂家焉是公高祖也諱爾寅諱景誼諱泰謙上三世也皆不仕妣漆原尹氏通德郎遇漢之女舉公於 肅廟甲申生時有異徵聰穎絕倫四歲作詩人爭傳誦其嬉戲作壇設聖賢位揖讓拜跪遠近稱神童先輩達官多就見者八歲讀中庸作費隱說明齋尹先生見之亟稱曰後生中吾道殆有望乎九歲讀尙書至棊三百璿璣玉衡圖說閉戶思

一晝夜盡解之其夙慧如此已而連喪考妣往依姊家于海南及長博涉經傳爲文辭有天得尤工於詩下筆數百韻旁通諸子以至星曆堪輿兵家之說靡不挾其奧而窮其指也少嘗過陽城見艮齋崔相國公與語奇之曰君才高不可以詞章自足宜用力於經學也自是脫然志於道盡焚其所爲書謁敬菴一菴兩先生于魯城聞爲己之學又從樗村沈先生講質洛閩之說粹然一歸于正公志尙高潔視利祿泊如也旣荐喪二親自傷爲養不洎遂廢舉子業孳家入頭流山縛茅爲屋終日危坐俯讀仰思少倦則登

山步壑看雲弄月翛然有遺世之意四方學者聞風而來者甚衆嶺右俗樸而少文始見公莫不駭然而笑久而翕然信服雖樵童緇徒咸稱以蘇先生然土豪之橫者獨心慕之會晉州有變書出陰構公以避世入山遂與士友數人同繫州獄公夷然讀書不輟事卒白蓋公身雖隱而名播一世往往爲人指目以是屢致橫逆然守正委命履困而愈亨處變而無悶尤可見素守之確所造之深也趙冢宰榮國聞公名貽書致禮公報書以示雅志韓御史光肇委訪于山中論薦意公書在汶二字以拒之公精爽過人黑

夜辨小字與入定僧較不睡累十日僧竟不能及焉雅有慧識論人吉凶輒中嘗求藏修之地人說安陰古縣之勝公獨謂是地將有大菑不可居未幾有逆亂革其邑平生愛山水嘗曰聖人已遠樂教淪亡人所以養情性滌邪穢進於清通粹朗之域者莫如佳山好水其必有怡然自得之妙而人不與知者矣始居山陰之紫烟洞後徙頭流之花開洞又入德裕之陽嶽凡三十年乃還庚辰十一月六日終于全州寓舍明年二月葬州北紆山先塋下配長澤高氏萬九之女忠烈公敬命之後無育側室子洙可公孝友出

於至性文章足以名世學問一遵正軌而卷而不試
自放於山水乃以布衣終身蓋其素志然也於公何
憾焉所著經說多佚不傳有春菴集若干篇亦可以
知公所存矣銘曰
金馬之郡箕跡攸遷孕秀儲靈乃挺豪賢巖居兮澗
飲荔帶兮荷衣山澤之癯歟少微之精歟跡何太奇
名何太盛天與其才不假其命花開之洞紫烟之嶂
花開水流神其來往

耳溪集卷三十 終

耳溪集卷三十一目

墓碣銘

良湖崔公墓碣銘

東岡崔公墓碣銘

遁谷李先生墓碣銘

蒙齋李公墓碣銘

執齋金公墓碣銘

副率任公墓碣銘

處士誠菴李公墓碣銘

處士崔公墓碣銘

處士閔公墓碣銘

處士南公墓碣銘

進士朴公墓碣銘

韓處士墓碣銘

權處士墓碣銘

耳溪集卷三十一

墓碣銘

艮湖崔公墓碣銘 并序

公諱攸之字子有姓崔氏本朔寧人高麗平章事天老之後也本朝名臣太虛亭恒以文章勲業官首相後四世諱彥粹選翰苑忤權奸官正言贈吏曹叅判於公為高祖也會祖諱穎禦侮將軍贈左承旨祖諱尚重司諫贈大司憲以才學重當世壬辰之亂為湖嶺倡義將自號未能齋有子三人長諱葆昌城府使次諱蓀左尹贈吏曹判書丙子難扈 駕入南漢及

和成杜門以終世稱星灣先生配南原梁氏主簿俊
遇之女卽公生考妣也季諱蘊以遺逸徵拜憲職承
旨皆不赴講學自修世稱砭齋先生前夫人興德張
氏後夫人文化柳氏皆無子以公爲嗣公以萬曆癸
卯生氣質清粹器度深厚及長不汲汲於舉子業務
窮聖賢之學人皆以大儒期之崇禎庚午中司馬丁
丑除景陽察訪是時南漢和成 世子赴瀋陽峻選
僚屬擢公授洗馬尋有命親老無兄弟者勿舉仍任
景陽壬午遭生妣喪乙酉登文科入槐院薦翰苑戊
子除葵樹察訪辛卯拜求禮縣監遭生考喪丙申拜

兵曹郎丁酉除金堤郡守戊戌丁承旨公憂辛丑拜
持平掌令司藝壬寅拜司諫執義癸卯除潭陽府使
未幾棄歸丙午選入弘文館修撰自是歲至庚戌屢
爲校理司諫執義輔德而多不就壬子丁母夫人柳
氏憂癸丑四月二十三日考終享年七十有一公以
剛明之姿承家庭之學講究經傳之旨明辨理慾之
幾驗之心而反之身常曰大學一書乃天德王道之
要平生用工專在是書而至於格致章闕文嘗慨然
而惜之因先儒之言更考經文以物有本末爲格物
之首以知止有定爲致知章血脈相貫功效有序至

王溪集 卷三十一
於諸經靡不沉潛究蹟耳順心得而達之於伊洛關
閩之書以極夫理氣性命之原嘗作爐火說以心譬
之於爐以性譬之於火人心譬之烟道心譬之炎氣
質之清者譬之燥薪濁者譬之濕薪反復論辨明齋
尹先生亟稱之謂得前賢未發之意又論養志養氣
之道以示學者用功之方曰志不先定則動極必亂
氣不素養則靜久必昏惟其有定也故動而能安有
養也故靜而能活其所以處動靜而不失其正則一
以敬爲主嘗讀朱子感興詩及武夷九曲歌愛其切
於日用而明於進道之序註釋而發揮之間又討論

鄉約本之以宋朝諸賢之法我東先儒之意酌古通
今節目詳備行之一鄉莫不興起若夫天文兵法河
洛星曆之數無不周知因渾天儀作竹圓子其儀一
重中置地平設十二時官不待水激而隨天自運比
諸舊儀尤極精緻守金堤時承命造置玉堂又藏一
儀於家火起傍屋獨不延燒人皆異之公雖屏居遐
鄉而愛君憂國之心未嘗少弛每於國家大政令大
典禮有懷必陳當 顯宗辛丑將祧 仁宗室公時
帶憲職上疏力言其不可請享以世室曰 仁宗大
王以生知上聖之姿加典學緝熙之功在春宮四十

餘年仁聞早播恩澤已深皇天不吊 龍馭之乘曾
不踰年深山窮谷號呼奔走雖堯之若喪何以加此
今若以有德而無功不享以世室則國家之所尊尚
輕重何如哉議竟不行識者恨之先是 孝宗大王
之喪議 大王大妃服制儒臣碩輔皆以爲 孝宗
次嫡承統當用賈疏四種之說爲朞服尹鑄許穆謂
當爲長子三年之服其後嶺南人柳世哲投疏主尹
許之論語甚悖妄公因辭職之疏極論世哲之非曰
孔子曰夏禮吾能言之殷禮吾能言之吾學周禮吾
從周今人遵今法乃孔聖從周之大經也 德宗大

王以世子昇遐 世祖大王服朞 睿宗大王以次
世子卽位一年而昇遐 貞熹王后亦服朞 仁宗
大王以長子昇遐 文定王后亦服朞 昭顯以長
世子薨 仁祖大王與 王大妃皆服朞 孝宗大
王以次世子卽位十年而昇遐正與 睿廟之喪同
體 王大妃一遵典禮而爲之朞卽 列聖已行之
制也請明書于一紙付於太學養賢堂使京外諸生
之遊于學者得以仰瞻則可以破羣疑解衆惑丙丁
以後痛念時事狃於昇平不思自強之策全無制勝
之具乃倣背嵬甲而作木甲制其說得行誠爲禦敵

之利器而時不能用可勝惜哉公性篤孝友前後執
喪哀毀逾禮先考砭齋先生常愛頭流白雲之勝作
亭於鳳城龍頭之上竭來逍遙公亦與伯氏鰲州公
陪杖屨詠歌而樂之亭之南有良田故取兼山之義
自號曰良湖公素亢直不能隨俗低昂多受人詆誣
釋褐三十年屈於下僚卷退丘園講修不倦時與洞
之諸老約爲九老會於丹丘臺平日所與遊皆一代
名流公之歿明齋挽之曰邃學可徵爐火說高才聊
寓竹圓機丘園自保幽貞志具錦終嗟世道非蓋傷
爲羣小所慍而不得行其志也配豐壤趙氏承旨邦

直女佐君子無違禮事舅姑盡誠敬與公同年生先
公一年歿葬于南原渴鹿及公歿合窆于求禮縣潺
水津上已向之原生三男長舉翁通德郎次載翁綺
翁並生員二女適叅判金載顯生員楊世基舉翁二
男與一與五二女適縣令尹楡士人盧澍載翁一男
與三一女適李鴻徵綺翁無男子與五二女適朴光
秀林葑曾玄不盡錄銘曰

帶方之州國於三韓山川胚精二南之冠崔維大姓
名臣顯官自未能齋承以星灣砭翁辭聘高風難攀
公又嗣興翱翔臺端正學發微通才濟艱爐火內省

玉海集 卷三十一
竹圓仰觀時乎不利止於良山宗儒有誅百世不刊
我愧托名維石噴吮

東岡崔公墓碣銘

并序

湖南大姓帶方之崔最著而其先本朔寧人肇起於
高麗平章事瑜價入我朝太虛亭恒再入相三策勲
文章事業載國乘五世而至諱尙重有文武才在翰
苑權元帥慄辟爲從事官止司諫贈大司憲號未能
齋子諱荇官漢城左尹丙子後不復仕贈吏曹判書
號星灣子諱徽之舉遺逸官翊衛終不膺號鰲洲三
世德行爲士林所尊并俎豆于鄉寔公會祖祖禰也

公諱是翁字漢臣妣曰南原梁氏佐郎楸女以仁
祖丙戌生公有異質警悟絕人八歲始讀史至孔子
紀自書曰學則聖人不學則不聖人鰲洲見而異之
及長益自勵十九發鄉解二十四鰲洲公歿梁夫人
繼以毀殞公荐失怙恃無意榮進仲氏內翰公旣顯
于朝公與季氏司諫公讀書山房相謂曰兄弟并揚
非戒盈之道汝若登第吾當廢舉未幾司諫公釋褐
公卽謝公車專心求道執贄于明齋尹先生之門又
質疑于朴文純公大爲所推重文純在朝薦公經術
連授童蒙教官宗簿主簿工曹正郎司憲持平俱不

耳溪集 卷三十一
就晚除廣興守廷臣白公守志不仕年過耆耄 英
廟特命陞秩拜僉知中樞府事庚戌四月七日以微
疾考終于東岡之廬壽八十有五公天姿粹美早親
有道繩墨甚嚴終日對案探蹟經傳家人未嘗見惰
容篤於事親病則晝夜不解帶喪則三年不去經奉
先以誠惇族以恩置祭田設義倉揭約立訓宗人咸
遵軌則鄉里幾於感化每值良辰勝景幅巾藜杖逍
遙於泉石之間氣韻清灑翛然有出塵之象閒居論
述嘗謂理氣心性爲聖學之本有天人合應之圖心
性一理之圖尤用功於禮學取文公家禮丘氏儀節

鄭寒岡五服沿革圖折衷近世儒先之說名曰家儀
成教於鄉塾學者稱東岡先生克享大耋神識不衰
及寢疾題詩曰晝夜陰陽理平生久自知時來又順
去樂命復奚疑令子姪讀聖賢書而聽之又召解琴
者彈數闌悠然而逝可驗平日學力之深矣有遺集
藏于家公凡三娶坡平尹氏叅奉叔舉之女忠憲公
烜之孫無嗣取族子與道爲後長水黃氏察訪倣龜
之女武愍公進之玄孫育三女歸士人尹東文吳大
運朴弼誼興德張氏護軍恠之女育一男與德一女
歸盧世東與道一男得賢一女歸李得性尹妻夫喪

五溪集 卷三十一
殉烈旌閭尹二男光龍光魯女歸具壑吳無育朴二男師宗師表二女歸奉事尹光洙宋載岳與德四男思賢叅奉徵賢基賢燮賢得賢三男瑾瑜東翼思賢二男璫溟翼生員徵賢三男祥翼生員禎翼致翼基賢一男性翼燮賢無子子致翼瑾子元錫寔爲宗嗣公歿葬于求禮縣潺水坐午原初配三配祔中配異麓公之玄孫碩孝齋素谷尹公光紹之狀來求墓石之辭余嘗慕崔氏爲湖南之望一門名儒世爲士林矜式義不可辭謹爲之銘曰

名家令胄儒門正軌持繩挈矩沉潛性理行本孝弟

教成州里高臥東岡簪組弗累鶴髮藜杖遨遊山水鳴琴在御題詩在几大耋不嗟乘化而逝君子曰終後人式似

遁谷李先生墓碣銘

并序

我舅氏樛村沈先生有道義之友曰遁谷李先生少從霞谷鄭先生聞爲己之學及摠衣于明齋尹先生之門繩墨益嚴踐履益篤沉潛性命之奧嘗著理氣四七說明翁見之嘆曰君可謂見得大原嘗行鄉飲酒禮於酉峰以公爲賓介及明翁疾病字呼公執手訣曰以君才質何遠不可到吾家東洙東源俱志學

王溪集 卷三十一
君其切偲而底于成也明翁既歿一遵師教力學五十年士論稱明翁之於公譬之孔門之有若云先生諱震炳字炳然本金山人高麗金陵伯唐益爲肇祖入我朝僉正諱勣師寒暄金先生曾祖諱穉師牛溪成先生祖諱萬業師沙溪金先生蓋其淵源如此考諱相縣監號水北有文有行名於士流樗村先生誌其墓妣羅州丁氏時萬之女後妣慶州金氏鼎昌之女先生以 肅宗己未生于錦山幼而聰穎端秀十三四歲能誦經書通大義以親老家貧治公車業屢占解額輒不利先生慨然自奮遂廢舉專心學問嘗

有詩曰簞瓢陋巷慙顏樂沂水春風慕點狂丁巳趙公顯命長銓部薦授 光陵叅奉先生不樂也樗翁貽書曰祿仕不必辭遂勉就數年例陞六品由監察爲真實縣監先生曰是不足以爲政耶首以正風俗淑人心曉諭閭里簡賦役講武藝公聽斷卹窮餓政清事舉延邑子之秀教授有程行養老宴諭以孝弟忠信之道一境翕然從化及瓜歸士民攀轅垂涕鑿崖而頌惠入爲廣興主簿先生年已七十矣棄歸安城僦屋而居與沈先生日講道爲樂丙子朝家推耆老拜僉知中樞府事以是年四月二十五日考終既

革呼孫敬鎮正席安枕翛然而逝九月葬于峨嵋山下乙巳移封于郡南梧村淑夫人金氏祔焉舉二男世墳世均世墳無子以從兄子圭鎮爲後二女歸鄭栢鄭履遲世均一男敬鎮先生爲學先識其大者一以程朱爲準躬行心得充養有道其讀書自四子五經至洛閩諸賢書通貫反覆日有課程尤用力於易經禮書如誦已言學者問易於樛村則先生輒曰往質于遁谷事親盡誠愛居喪廬墓手植木禽鳥亦有感化如董邵南事者良浩少從學於樛村門下屢拜先生於函丈德容渾成望之儼若泥塑卽之和氣襲

人未嘗不醺然心醉也樛翁每以尺楮小詩往復聯翩知其相與之深有非後生所敢窺者先生沒三十餘年敬鎮賈李公喬年所爲狀來乞銘李公賢士其言又可徵也謹序次而系之詩曰

吾道旣東發自寒暄惟坡暨沙正學微言公家三世薰德有源克趾先美早見大原師維明翁友則樛村年高理熟行備德醇墓樹勿剪士林攸尊

蒙齋李公墓碣銘

并序

公諱燔字希敬姓李咸平人以高麗神武衛大將軍彥爲上祖至我朝漢城左尹從生討破叛賊李施愛

名振朔方號稱黑面將軍策封咸城君諡莊襄其後
累世高官嗣勲至諱效元官大司諫於公爲曾祖也
在昏朝疏擊賊臣瞻弘荐棘海島十六年及癸亥改
玉蒙宥歸臥田廬不復仕世稱長浦先生祖諱浚司
憲府監察考諱柱吉 寧陵叅奉公實大諫公季子
諱灤之子出後於叔父妣義城金氏塘之女大司成
申公敏一之外孫也以崇禎後十四年丁酉八月二
十一日生公于青陽氣質清粹聰穎好讀書稍長受
業于酉峰尹先生往來問學壬戌叅奉公歿公執喪
踰制晝夜不去衰絰冬不就溫夏不就涼三年讀禮

書旁取東儒禮說講究辨證扣質於師門旣除奉祖
母暨母夫人左右忠養不少離暇則正衣冠讀經傳
微辭奧旨儀章名物靡不講究有疑則書之冊求正
於先覺以至星曆之度著策之法兵家之類舉皆汎
濫通曉甲申一疾不起得年纔四十八士友莫不出
涕宗戚之疎遠者皆爲持服學徒之加麻者甚衆始
葬于本縣道巖里戊戌移窆於舒川建巖甲坐之原
室南原尹氏叅奉禾之女舉四男三女長喜春娶應
教沈濡女生二男次喜泰娶大司諫林濩女生一男
次喜疇娶叅奉尹孝教女生二男次喜畦娶縣監尹

王溪集 卷三十一
掄女生一男女歸尹東島高漢始金台鉉公篤於內
行旣孤以事父者事伯父季父殫誠奉養割田土以
資衣食羣從八人同居一室教訓成就親戚之貧窶
者皆以爲歸不能婚葬者爲之救助尤謹於奉先之
禮置祭田立宗憲每節享設會於墓下序坐讀法因
行獻酬之禮宗人咸矜式焉中歲以後棄舉業刻勵
求道一以繩墨自律扁其室曰蒙齋潛心於易經洪
範探賾天人理氣之妙師門有托後學有模而天不
假年未克大底于成惜哉有劄錄五卷藏于家公之
曾孫揚運具公言行來請志墓之辭余觀公得賢師

志正學修行於身爲政於家宗族感其義鄉黨服其
孝是可銘也銘曰

學而得師蒙以名室如山出泉猶海將達明體及用
致知先物王制十則本末俱挈禮以治兵範以準易
枝分縷析有圖有畫志遠年短教行門族春秋講修
觀此墓石

執齋金公墓碣銘

并序

伯舅樛村先生嘗謂良浩曰近見學者之及吾門者
惟金元直姿質粹美操履純篤他日可恃也汝其與
之講學是益友也時元直來住學舍讀朱書與余討

論質難見解精深竊嘆其不可及既而散歸京鄉相望落落而元直每因赴舉從仕到漢京輒來訪余亦宦遊湖嶺屢造其廬扣其所得顧余立志不確浮沉世路卒未有所就獨元直老而彌堅充然有自得之容余未嘗不愧服元直沒其子進士佐漢旣免喪述遺事諭余曰先人嘗言今世知我者惟耳溪一人非丈人誰銘吾父者余曰然遂讀而敘之元直諱敬之本江陵大姓徙居忠州考諱壽龜廣興奉事妣全州李氏叅奉休成之女生考諱壽龍進士少遊明齋尹先生之門志學無年公器宇秀朗風儀端重早襲庭

訓有志於爲己之學負笈師門專心求道先生一見而器之語之曰學問之道不過求放心而已其要在一敬字其目是正衣冠尊瞻視九容四勿也仍作操存省察箴以贈之公對曰存養省察雖是兩事存養之功實貫始終歟先生喜曰君能見未發時境界須看朱子中和第六書當有所得也又教曰士之立志嘗患不强宜以發強剛毅有執自勉也公退而書諸紳以執齋名其室遂熟讀四子書而尤用力於中庸深究性命之原反之於身繩尺栗如也著性善理氣說以自省存心以居敬爲本事親以養志爲重嚴君

耳溪集 卷三十一
嘗曰吾家箕裘之業惟是文行而世傳簪纓非科目則無以出身事君也公以是兼治功令淹貫經傳下筆成章詞賦對策皆出輩流 英宗癸酉中謁聖丙科以注書入侍 上問義理二字筵臣多張皇敷陳公奏曰在物爲理處物爲義 上稱善乙亥丁奉事公憂旣闋除保安察訪辛巳例陞六品拜成均典籍禮曹佐郎甲申遷兵曹正郎出爲江原都事庚子除開城經歷開城王氏故都也吏民競錐刀好干囑婦女喜遊衍廢蠶織汙俗靡靡獄訟滋繁公揭榜而訓飭之民皆感悟而誦習焉修繕學宮居業較藝躬造

而指授之其有節孝者月致米肉貧不能婚與葬者捐廩以周之一境風動浸浸然禮教興行周年而坐事罷歸老幼攔道呼號至有不舉炊者丙午擬司憲府持平未拜蓋公以故家華裔世有名宦而奉事公嘗陳明齋辨誣疏爲時詆譎故通籍數十年終不許清顯至是始通望而人猶有噬之者噫以公行義之純篤經術之精詣才識之通鍊可以範俗可以需世阨於時終不得一施及其晉塗稍展而公亦逝矣人莫不嗟惜然於公何損焉惟是士友凋零殆盡斯文一脉之傳無所托焉余所以愾然長吁也公生於

肅宗庚寅二月二十二日歿於今 上丙午七月四
日葬于忠州可興村初配全州李氏進士頤濟之女
後配安東權氏讚之女舉三女無男以宗弟進士時
玉之子爲嗣卽佐漢也女長適李志謙判書整之五
世孫進士東稷之子次適吳喜秀判書命峻之曾孫
泰逸之子季適尹永鎮明齋先生之五世孫弘基之
子側室二女具濂韓明鎮妻也佐漢娶縣監李寅漢
孫重杓之女生二男長宗洵餘未名所著詩文六卷
經義多發揮可傳於後其世德官闕余嘗表公弟士
宜墓故今不具述銘曰

道有所受學則由己剛毅有執存省不貳反身蹈繩
識明行粹祿非求榮仕以行志薄試分司革陋知恥
治不易民曷不大庇路有夷隘我則一視歸臥江湖
坦乎其履年高道積充然外晬我銘無愧師門攸恃

副率任公墓碣銘

并序

良浩少從樛村沈先生學于安城先生居郡之西里
副率任公居郡之東里杖策往來良浩得以瞻儀容
而聽講論公頤幹豐貌美鬚髯氣像冲澹無一點塵
俗態與人語表裏洞豁不置城府粹然士君子也古
人所稱鄙吝自消者如公之謂也未嘗不虛心敬服

又與其胤子善仲氏遊弘辯溫雅外和而內莊可親而不可狎良浩得從公父子間遊自然有相觀而善不言而喻者矣不幸善仲壯年奄忽幼孤零丁不復相聞未幾先生亦下世斯文舊遊邈然若前世事中夜思之黯然傷懷今公會孫俊常登科來漢京追講世好具公言行托以樹旌之詞爲之相對愴然義不忍辭公諱思敬字汝直通德郎震英之子明齋尹先生之外孫也生於 肅廟丙寅纔晬先公歿尹先生憐其稚弱携去而教育之四歲入學已曉文義稍長聞操存窮格之學日侍函丈時先生年高德邵及門

之士甚多公與敬菴一菴兩公爲之主講磨道義遠近書牘叩質禮疑者盈箱溢架從傍提悟先生甚宜之公素性恬於名利不屑爲功令文嘗於監試會試天將雨不入場增廣覆試人有竊謗公文者笑而與之以是卒不利自丙申師門遭誣永謝公車專意學問而病夫世之學者虛內騖外平居杜門却掃沉潛墳典 英廟庚申選經術除 光陵叅奉不就乙丑拜翊衛司副率時 莊獻世子在春宮睿質天成書筵方講 御製自省編至遠庖厨章公極陳禽獸亦有惡死之心雖不得已充俎豆然有限節故聖王仁

愛之心自親而民自民而物湯德所以及禽獸也又
曰學問以行爲貴諺有黃粟尙書之說蓋經書中尙
書文最奧初學如啖乾粟急嚼則損齒必輕嚼而細
吮之然後可以知其味然飲食則不過一時之飽學
問則爲終身之飽賓客鄭羽良曰桂坊是先正臣尹
拯之外孫學有淵源所陳皆篤實願留念焉公謂
世子春秋方富講學日淺雖開書筵數行誦讀之後
相率交臂而退只文具而已每因文義敷演導達期
於啓發講官傍聽者始頗不悅後乃服其經識已巳
冬丁大夫人憂公年已逾耆而一遵禮不懈旣練而

猶食蔬菜丙子夏嬰風疾丁丑九月十八日考終于
正寢公天稟絕高淸淨寡欲視功名泊如也毀譽禍
福一不動心家屢不炊而夷然也惟手書卷老而不
倦每到人家暄涼畢輒披架上冊雖於吊喪聞喜之
席猶然人或竊笑之而不顧也外似疎淡而內實縝
密在丙子丁酉之間卞誣事出內贊舅氏章疏外酬
士友書疏先要立綱欲刪繁蕪嘗答林學士象德書
曰師生相絕一事必并舉道不合情不保而言之然
後言議不墮於一偏而事實自得於公正縷縷數百
言足以折兩家之訟破後世之疑林公深以爲然爲

耳溪集 卷三十一
文章本源經傳下暨洛閩諸書無不咀嚼厭飫而辭
雅理實詩亦格古而有韻致尤該洽於史志自三代
以迄大明自檀君以逮于我朝數千年治亂興衰之
變山川道里之形莫不淹貫言之纒纒聽者忘倦嘗
擬文學鹽鐵之議著成一說彙爲四編以至星曆度
數兵機吏治要藉之實用曰真儒之學視天下之務
皆吾分內事也時與子弟論國家政令朝紳賢否某
事將必如此某人後當如此往往皆驗人或疑其有
前知之術而公則實無是也蓋其平日多讀書絕嗜
慾寡思慮心虛眼明推古準今論人而叅之理就事

而驗之時自然不失尺度苟非悟道者能如是乎昔
孟子言大人者不失赤子之心余亦論公平生一言
以斷之曰能全赤子心云爾任氏之先貫于豐川有
諱澍仕高麗爲御史大夫子諱公松忠惠時平亂有
功封西河府院君入本朝世有簪纓爲望族高祖諱
碩齡號石江當癸亥靖社解關東節而自靖不仕曾
祖諱景莘別坐祖諱耆郡守明齋尹先生誌其墓尹
夫人詩禮治家有女君子風配東萊鄭氏牧使贈贊
成赫先女先公卒後葬同塋舉二男四女長有神才
美質十三歲殤次顯中刑曹正郎文章經學爲士流

耳溪集 卷三十一
所推女長適龍仁李文祐次副率李喬年次士人朴
祖源次進士柳焞正郎無子取再從弘中子希九子
之三女歸縣監趙潞鎮士人李霽叅奉朴肇源希九
有文行又早夭無育以其兄子俊常爲嗣實尸公祀
文科今正字銘曰

孟子說心赤子大人純一無僞萬善俱全火燃泉達
片言單傳昔聞斯人今見其真不假修爲肫肫其天
旁通古今觸類洞然如雲棲山如珠潛淵樗村之友
明翁之孫我銘其石莫窺其門謹掇庸行以貽後昆

處士誠菴李公墓碣銘

并序

良浩少侍伯舅沈先生於安城之樗村先生屢稱李
陽甫質美而志確後進中可仗遇嶺人輒言一善有
莊士知之否陽甫時年甫弱冠余雖未見其面而心
已折服未幾陽甫負笈門下懽然如舊識陽甫爲人
白晳脩幹骨清而神秀與之言昂然以古人自期不
覺肅然起敬論其世其大人樂齋公與我王父芸窩
府君文契甚厚遂與托交不獨爲同門友也後數年
先生棄後學家遂覆門生四散余則在京從宦陽甫
跡不到城闈時逢南中人訊其安否而已近聞陽甫
歿無長成兒不得問孤恤生心焉如有負有一年少

來訪自言居一善欣然相接卽陽甫從孫而將乞墓道之辭者也回憶舊遊悲與喜并遂讀其遺事而敘之陽甫諱挺洛生於英廟乙巳有異質不喜童子遊旣入學聰悟絕人不勞教授十歲樂齋就食嶺南之善山須臾不離側左右服勤丙寅樂齋歿陽甫血泣哀毀葬前啜粥至小祥不食菜果一循古禮服旣闋束脩於樗村之門先生嘆其篤志勵行自是脫然專意於學問間以親命赴舉而非其好也壬午遭母喪持制一如前喪盛暑不脫經帶每晨上墓哭省不以雨雪廢丙申遭國哀三年不肉朔望登山而哭戊

戌三月五日與鄉人望哭釋服有以酒肉饋者却之曰今日不可也明日乃作詩曰方喪三載謹微軀臣分何嘗貴賤殊哭盡蒼梧除素服難忘至德更嗚呼聞者莫不感歎歸家始入中門與夫人拜而見凡遇國忌自肅廟以下皆素食三日故舊之喪及吊人喪亦一日素食其制行之嚴如此他可推也燕居必着上服端坐讀書周子太極圖程朱諸書性理大全近思錄常置案上爲學以居敬窮理反躬實踐爲宗終身不懈蓋受於師門者然也晚年題其室曰誠菴庚戌正月十三日終三月葬于金烏山東負丙之岡

耳溪集 卷三十一
李氏星州人高麗開國功臣恩言之後也入我朝冠
纓不絕多達官聞人高祖曰尙逸慶尙道觀察使號
龍巖以清德著名曾祖曰墀丹城縣監生四子長諱
志長通德郎次諱志容承議郎考諱世珩進士號樂
齋以通德第二子出系承議後妣坡平尹氏提之女
不憂堂海舉之孫也早卒無育繼妣咸陽呂氏光錫
之女縣監端齊曾孫也樂齋少受業於明齋尹先生
淵源蓋有所自云陽甫前配安東權氏進士訥之女
無育後配平山申氏光魯之女舉二男元普三十而
夭有一子景宇乙普出後於季氏早卒傷哉銘曰

外莊而內和篤守而行義命係於天學則守於己雖
窮其身而不能奪其志七十慥慥未見其止先師遺
訓之死不貳故人題墓表以處士自號曰誠敢溢其
美

處士崔公墓碣銘

并序

靖陵之世士類蔚興實由趙文正之功而及至己卯
禍作名編黨籍者皆足以名世而燾後余於扶安崔
處士見之矣處士諱弼成完山人高麗侍中阿之七
世孫戶曹叅議灑之四世孫也會祖匡之集賢殿直
提學祖生明京市殿直考秀孫進士號固窮妣崔氏

耳溪集 卷三十一
司正孝老之女非一崔也公生於成化癸卯幼而穎秀長而篤學與內從成博士重淹爲道義交成公及於燕山戊午之禍公自是絕意名利遯跡鏟光事親盡孝兄弟五人同居共被鄉里化之固窮公嘗植五槐於庭曰吾子五人登科當懸鼓於此樹已而皆中大小科邑人謂之五鼓里公連遭父母喪親負土成墳廬墓六年毀瘠成疾朝廷薦其孝 中廟嘉之命與弟繼成並旌其閭世稱二連靜菴趙先生舉公於賢良已卯錮廢杜門不出學者多從之遊丙午卒于家 肅廟甲午道內章甫立祠本縣殿直固窮暨公

及弟處菴以清名純行俎豆一鄉公族曾祖烟村諱德之當 文廟末年見幾而作人服其明哲亦享靈巖何其盛哉配光山卓氏生二男長清無后次海叅奉生二男芬副護軍蘭叅奉女部將金忠朴妻護軍一男潤叅奉二男淵澗處士傍孫鎮衡列其言行千里來京師求余言刻墓石年代旣遠事蹟未詳謹稽已卯諸賢傳曰崔某奉母至孝才兼文武嗚呼是可
以知公矣於是乎銘銘曰
靖陵中興士無不揚才全行篤名達身藏三世四賢
俎豆一堂風聲遠樹式此南方

處士閔公墓碣銘

并序

良浩少日執杖屨於樗村沈先生之門見一士友與安齋趙公聯裾往來而獨其容貌嚴整步履凝重令人望見可畏而知爲處士閔公心竊敬憚而良浩齒方隅坐不敢與聞於談論只傍聽上下經旨極甚研幾非年少輩所能諦解但見先生之怡然虛受終夕不厭焉如是者歲月無多而處士遽歿先生悼惜之甚作哀輓百韻以哭之可見平日期許之深非諸子比未幾先生下世及門之士水落星散而處士之子弟捲下湖曲跡不到京洛吾亦老白首聲息不能相

及追憶斯文往事若隔前生未嘗不中夜侘傺也今處士胤子深遣其子賡樗翁所爲誌文來諭余曰當世知吾先人者惟公在耳非公之托而誰也余愀然愴懷義不敢辭謹按狀而敘之公諱鉅字士相節度使諱昌基之子母貞夫人晉州柳氏水使星一之女處士生於 肅宗辛巳幼而聰穎絕人受讀禹貢五遍卽背誦少從李西礪真洙學李公課之嚴一日召與語曰人各有志汝則欲何爲對曰願爲聖人李公哂其妄而心獨奇之及長慨然有志於學問棄舉子業取小學書爲模範平居整衣冠終日危坐儼如泥

耳溪集 卷三十一
塑人夜不設寢具睡來常嚼黃連或掬雪泥以洗眼
夜則枕尖木以警之其立志也常曰仁不如堯孝不
如舜學不如孔子皆不盡吾分也其修己也常曰身
口之過人得以議之心之過鬼神知之攻吾過者是
吾師談吾美者是吾賊書壁自省其讀書也九經之
訓濂洛之書循環熟復高而性命近而人倫幽而鬼
神散而萬物以及義理王霸之分靡不研究洞析其
事親也愉色婉容先意承志藥餌必嘗便尿必察間
值歲儉自啖松葉而甘旨無闕觀於節度公祭公文
可見矣其奉先也必誠必潔一遵家禮籩豆之餘勿

令卑幼先食皮殼毋令踐蹂求得遠祖丘墓重修而
設輪祭其求道也常曰有體則自有用下學則自上
達蓋其用力專在踐履而銖積寸累以期融徹自謂
氣質過於剛嚴以弘扁其室以矯揉之少與安齋趙
公結爲道義交切磨講討不合不措並世先進如敬
菴一菴兩尹公樛村沈公櫟亭元公星湖李公皆所
尊仰而就正者一菴知之最深每語人曰吾侍先祖
杖屨閱四方士多矣未見聰明篤實如某者也辛酉
六月二日患癘至甌而後不能坐乃歎曰昔寒暄先
生邁癘終不臥讀書而退熱此何等定力也以兩尊

人在堂將移次於外冠帶拜辭如常時既就次見臥處所設屏乃祭時所用也公病昏中諦視之曰此屏何可褻也亟令去之以是月十四日竟不起得年厯四十一從遊之士多服麻而遠近聞之莫不痛惜相吊焉以是年八月十七日葬于通津位谷先塋外丙向之原嗚呼自夫世降而道學泯士能脫然自立以小學律身謂聖賢可學者尠矣惟公不資師承奮然邁往刻志礪行俛焉惟日孳孳可謂豪傑之士也奈何天不假年中途傾歿豈非斯文之不幸歟閔氏起於驪輿以尚衣奉御稱道爲肇祖入我朝有諱審言

爲開城府留守 光廟受禪棄官去徵不起高祖三道統禦使諱震益 仁廟朝名將也丙子挺身出圍城徵兵勤王曾祖諱昇全羅道兵馬節度使祖諱師魯贈戶曹叅判累世以武進而節度公早聞爲學之方以山西名家之胄黽勉從事而居官御家俱有法度焉處士娶羽溪李氏通德郎鳳采之女舉二男二女長深次澹女歸李發源宋 再娶昌原黃氏進士相之女無育深二子孝懋悌懋銘曰

昔周夫子謂聖可學愚者不信懦夫則畫公惟自奮獨拔流俗刻意礪行如射有的倦則沃雪寐則枕木

先立大本達道是擴樗翁有言默契心得道遠年短
比呂與叔胡天弗祿士友相哭刻辭片石後生是式

處士南公墓碣銘

并序

南鵬路嶺左高士也余曩歲尹東都聞其名以禮延
聘爲多士師講經傳肄文藝於是東都之士蔚然興
大鳴于禮部及余還朝鵬路亦膺道薦授 寢郎不
就著書以終老旣歿余寄詩以哀之其子景采哀其
言行遣其弟景羲走京師求余言以謀壽公者余何
可辭公諱龍萬鵬路其字也其先英陽人以英毅公
敏爲上祖至監察御史須入寧海六世至進士慶薰

遭壬辰之難徒步從郭將軍再祐守火旺山城有子
曰佶中光海丁巳司馬李榮久榜榮久希凶黨旨將
率一榜投廢 母疏聞之大驚立就道還鄉士論偉
之是爲公高祖曾祖諱尙周從仕郎生五男皆傑然
出羣世稱南氏五龍第三曰宇明處士第五曰九明
文科府使以廉白文章稱於世號爲寓菴始家于慶
州長子曰國衡娶驪江李氏晦齋先生之後德咸女
有五男公其二也出後於從祖叔父國先實爲處士
公嗣孫妣曰宣城李氏彪之女也公幼而聰秀嗜書
尤喜史記漢書至忘寢食不問家生業少治功令某

年中生員試遂廢舉專意讀聖賢書著大學章句難
疑其於辭賦古文有作者風從學者築室於活山之
南德谿之上爲晚年藏修之所求余書其扁贈之以
序今 上戊戌除 禧陵叅奉公曰今 聖人在上
不仕無義也顧老無能爲耳遂辭以疾復除 齊陵
叅奉又不就然嘗曰君子於天下無分外事爲學而
期孔顏非僭爲治而期平天下非迂也外若無意於
世而常惓惓於經濟之學欲一陳於明主之前辛丑
冬 上因災異求言公遂演 御製所下大學十條
陳致治之道救弊之策凡萬餘言方伯格不上遂卷

而不出甲辰正月二十六日以壽終距生年七十六
歲卜得是歲八月十八日葬于府南文巖里公凡再
娶前配豐川任氏處士榦世女生一男卽景采生員
後配瑞山柳氏叅奉宜健女生二男一女男卽景義
少年登科今佐郎景和早夭女適孫星慶景采二男
三女鳳陽鴻陽女適張胤楨孫承說一幼景羲三女
長適鄭夏澱餘幼公爲人端慤靜修平生無戲言褻
容獨喜佳山水輒欣然忘返余在東都每值春秋令
節設會於紫玉之山半月之城公未嘗不與焉命觴
賦詩揖讓獻醕管絃交作文采風流爲一時盛觀嗚

呼今何可復得也所著詩文若干卷余嘗爲之序今不復論銘曰

大嶺之左東海之陽鰲山亭亭蛟水洋洋乃如之人瓊佩荷裳有潔其操有斐其章士傳遺篋子揚前光我銘其藏松檜有香

進士朴公墓碣銘

并序

公諱師喆字道明姓朴氏麗季有潘南先生尙衷道學忠節與鄭圃隱齊名始官右文館直提學本朝贈領議政諡文正遂爲潘南大家子平度公嘗事我太宗有佐命勲官左議政錦川府院君自是世襲簪

纓至文康公紹學問名節爲己卯士流所推官止司諫後贈領議政世稱冶川先生子靖懿公應順實誕懿仁王后封潘城府院君贈領議政於公爲六代祖也高祖諱潢以潘城公弟大司憲應福之孫觀察使東說之子入嗣于潘城公子司僕寺正東彥官至大司憲爲仁廟朝名臣曾祖諱世相廣興倉守祖諱泰辰社稷署叅奉兩世俱贈吏曹叅判考諱弼義贈左承旨蚤卒再娶坡平尹氏府使商三女以庚午五月二十八日生公甫九歲祖考考相繼歿擗踊哀毀無異成人庚辰又遭曾祖妣喪冲歲荐被衰麻尹

耳溪集 卷三十一
夫人教督有法公服膺慈訓蚤夜不懈稍長受學於叔祖東溪公詞藝日就及爲功令業捷給典麗公車輒居前列而每屈於覆試人皆嗟惜嘗赴會圍有姻親人同坐多襲公作示公曰吾年長且有老親不得不剽竊君作君能容我先呈乎公卽許之毀其藁更製其人果嵬叅而公遂不中公夷然不以爲意癸卯始占進士試選部惜其屈屢舉銓注而竟未霑一命壬戌丁內憂甲子又服承重祖妣喪自是絕意科宦恬靜自守乙亥七月六日卒以十月葬于楊州先塋內丙申二月移窆于長湍芬川里良坐之原公儀觀

秀偉性度寬和而操履堅確制行不踰矩矱孝友根天奉祖妣暨妣先意順適五十年如一日尹夫人亟稱以孝子教育仲弟至於成立事季父無異嚴君區分田產祭位外悉以奉焉晚年家業旁落衣食不繼而處之晏如前夫人柳氏家歸以一大庄而固辭不取聰明過人見識透明事遇難處迎刃縷解百家書一經眼不忘文辭精約暢達操簡卽就一時儕友咸期以早揚雲衢需于王國而白首蹇連一無展布豈非命歟公歿後二十餘年公之孫宗正妙齡擢魁科唱名之日咸謂公不食之報也前配贈貞夫人晉州

耳溪集 卷三十一
柳氏錫祚之女叅判之發孫女也生於己巳賢而短
年繼配贈貞夫人延安李氏湜之女領議政時白之
玄孫也性行純淑婦德甚備生於己巳先公十四年
卒兩配始皆各窻後合祔于公墓後配舉四男長恒
源蔭僉正以壽秩同知中樞次鼎源履源升源諸孫
相宇相宅相容都事李勉恒妻長房出宗儼宗做趙
絢采宋喜鼎李敬翼妻二房出前正言宗正宗度宗
文三房出宗耆四房出曾玄孫不盡錄良浩生後公
未及周旋於鄉黨而正言君以文學爲後來之秀識
其淵源有所自矣今疏公言行來請墓道之辭謹撰

次而系以銘曰

行積于家才優於世何賦之豐乃命之盭祿不逮身
歸羨于後有孫揚名受天之祐芬川之岡淑媛左右
我銘非華惟石之壽

韓處士墓碣銘

并序

始余弱冠遊士友間見一少年頽而莊容止異凡間
之北士韓其姓誠之字者也余心奇之後十數年一
再見京師學益進操益堅傑然爲北方之望一日誠
之遣其子洙賈其大人處士遺事乞余銘屬余病謝
不能丁酉冬余貶官北塞誠之出迎于草原之館請

益力余感其誠遂按狀而敘之韓北之大姓系出安
川府院君卿兩世爲高官十四傳至或以武進壽秩
資憲生晉泰篤於孝悌人稱長者仍世家定平於處
士爲祖若考也妣曰陽城李氏贈戶曹叅判英璫之
女處士諱緒字纘卿質厚而履方篤守而好義事大
父父母順而慤家素窶甘毳以適內行孚親戚悅焉
州黨式焉李判決事格其內舅也亢默寡可嘗曰古
稱孝子有婉容於某見之矣子思喆慕古人爲己之
學處士喜曰是吾嘗願欲而未能者汝其成吾志邑
有靜巖山屏壑清邃處士樂之營小屋俾思喆讀書

蓄業卒底有聞觀乎子可以知父之教矣處士生於
庚辰十二月十日沒於壬戌八月十一日葬於文山
鄉德化洞壬申改封于先墓前背丁之原配全州朱
氏佐郎杞女祔焉子男四人長思喆卽誠之以薦授
安陵郎次希喆允喆濬喆思喆四子灝洙溥淳希喆
無子以洙後允喆三子深沉泳濬喆一子洞曾孫不
盡記盛矣哉余登鐵嶺躒鼻白涉龍興之江放乎雲
田之野覽王跡之肇基履將相之遺墟山川雄秀蟠
挈亭毒宜有魁才異等磊落踵躡而何數百年寥寥
也昔漢之興蕭曹周樊並出於豐沛而其後不復聞

耳溪集 卷三十一
焉豈地靈之鍾於人有限而物太盛則衰歟然氣化之流易與時消息滄海必生明珠名山常挺奇木吾觀韓氏之世愿樸劬勵以積以蕃安知無蔚然成材爲王國需而揚前人光耶吾將於是乎徵焉乃系以銘曰
實之碩根之澤約其躬豐其食詩云無念爾祖聿修厥德嗟爾韓氏之子奈何乎不勗

權處士墓碣銘

并序

曹學士允大奉使如嶺南歸言花山有權處士地甚微行甚高學者稱麗澤齋而不名蓋幾乎古之遺逸

而老死於草萊惜哉一日有嶺士權達時者繭足踵余門擎書幣再拜曰吾師權處士賢而隱者也歿有年未有樹墓之辭諸門生謀所以壽亡師者非公言莫可余旣慕其名感其誠亟讀其狀而敘之處士諱載運字景厚高麗太師幸之後世居安東爲戶長祖曰大平父曰壽百母曰蓬山吳氏方產異香滿室俄而處士生幼而敦重不羣戲從塾師學慧而勤及長襲吏役服公事惟恪過殿庭校門必拱而趨同儕皆目笑之處士不爲動性嗜書涉濫百家喜孫吳之法精隸首之學時李願齋楊李訥隱光庭李東崖浹講

學於黌舍處士摠衣而從之請受東西銘敬齋箴有
年少自外入曰官吏何爲來顧齋笑曰非官吏乃學
者也自是謝吏籍勵志求道從顧齋講濂洛諸書及
顧齋歿心喪三年有弟啓運亦敏而有志聯床講討
相長以相樂也名其室曰麗澤壁揭聖學十圖天命
圖每聞鷄而興盥櫛整衣冠終日儼然如對神明其
學以忠信莊敬爲本直內方外爲律其教人自灑掃
應對至收心養性循序而有節度士民從學者數百
人觀其言貌咸知爲處士門徒鄉黨莫不尊信凡有
所爲必曰權處士以爲何如於是方伯邑守聞其名

交致禮焉嶺之名士如李大山象靖金九思樂行姜
懷仁再恒柳大諫正源皆折輩行許交從遊切劘至
其事親友弟居喪奉祭一出於誠而無違於禮洎
英廟上陟處士年七十六矣猶素食至期月觀乎此
可驗其平居制行矣以戊戌六月十五日終于家距
生年七十八門人葬于縣東面負亥之原處士三娶
皆金氏一男曰洽三女適人一女未行自夫退陶先
生倡道于東南安禮之間稱海東之鄒魯宏儒碩師
肩相望也若處士奮起閭井之中力學嚮道卓然有
立可謂豪傑之士也是豈獨大賢之遺化然也國家

耳溪集 卷三十一
數百年作人之功於斯盛矣孔子曰魯無君子者斯
焉取斯處士亦云乃系之詩曰

大嶺之南文明攸萃洛水之東大賢攸起有路如砥
坦乎其履羣英斐然家絃戶禮元氣冲融蒸成嘉瑞
在草爲芝在泉爲醴在人爲傑如彼處士居卑志崇
篤守勇詣嚶嚶古人有爲若是勒辭揭封以勸來軌

耳溪集卷三十一 終



